

კოტე ჯანდიერი

გლობალიზაცია

დათო აზნიაშვილს და ნოდარ დუგლაძეს

ანეკდოტი ხო გაგიგიათ, კამეჩანთკარელი კაცი ალაზნის პირას რო წამოწოლილა და ვირებს გასცქერის? და თან იძახის: „სოჩაა, მა რაა!“ გაგახსენდა-ათ?! რალა მაინცდამაინც კამეჩანთკარელი და არა საზოგადოდ კახელი? ეხლავე გეტყვით. ჯერ იქიდან დავინყოთ, რო სადღეისოდ, აბა, სხვა რომელ სოფელშილა ჰყვანთ ამდონი ვირი, რო ეგრე თავის ნებაზე მიუშვან ნაპირ-ნაპირ საბალახოთ. რაც ბენზინი და სალიარკა გაძვირდა, ტაჩკაშეუბმელი ან საპალნედაუდებელი სახედარი, გენაცვა, კახეთის სხვა სოფლებში მე არ მინახამს, დაუსაქმებელი და უდარდელად გაგორებული კაცი კი – იცოცხლე! თანაც, ხო არა გგონიათ, უქმე დღეებსა და დღესასწაულებზე ვიძახდე? არა, კაცო! ჩვენში ყოველ ცისმარე დღესა ნახამ წოლისგან გვერდებდაბუყებულ მხვრინავეებსა. მერე და, სად აღარ კოტრიალობენ მამაცხონებულები: ზვარში, პურში, კანტორის უკანა ბაღში, ექსკავატორის ჩრდილში; თივის ზვინზე, კაკლიძირსა და ბალკომის ტახტზე უკვე აღარას ვამბობ! ეგ არი ჩვენი ხალხი დღევანდელ დღესა! კამეჩანთკარი მაინც თელ კახეთში პირველია, როგორც რო გრილ ადგილას წამოწოლის მსურველთა რაოდენობით, ისრე უქმად მოცდენილი და ჩასუქებული ვირების სიმრავლითაც. ვირებია ამ ჩვენ სოფელში – როგორც გინდა, სულო და გულო: მზეზე შავად მოზიბზიბე, ჯანიანი ჩოკინები; ჯაგარაბურდული, დაჩოლახებული ბებერი სახედრები; გვერდებგაბერილი, მაკე დედლებს აკიდებული ჩოჩრები...

რა არი? პლიონკა გათავდა-ა? ხო, კარქი, დეგელოდები... თქვენა, შვილო, ეგ სად უნდა გაუშვათ? რადიოში-ი?.. და როდის?.. აჰა!.. თამარა! გესმის, ქალო, ე ბალები რას იძახიან? „პარასკევ დილას, ეგ ემ ასოცი და შვიდიო“. გაიგე-ე? მე ვერ დავინახსოვრებ, შენ ჩასწერე მაგ პრიხოდ-რასხოდის რვეულში. ნეტა ეგ „ეგ ემი“ რა უნდა იყოს? რა ვქნა, კაცო, ძველი რადიოებისა მესმოდა, „ესტონიც“ კი გვედგა ზალაში; მემრე „სპიდოლა“ მაიტანა ცხონებულმა ანიჩკამ, ჩემმა დამ; ვიჭერდით თბილისსა და მოსკოვს... ამ ახალ რადიოებს კი ჯერთ ალლო ვერ ავუღე.

ისე, მე რო მკითხოს კაცმა, საზოგადოდ, რადიო სჯობია ტელევიზორსა. უსმენ ადამიანების ხმებსა და თვალდახუჭულად თუ დაუხუჭველადაც იგრეთს წარმაიდგენ, როგორც გაგეხარდება... შენ ჭკუაზე, რა! არ მეგენონება – მათრობ თავსა და ახალს დაადგამ. ტანისამოსსაც, როგორსაც გინდა ისეთს ჩააცვამ... ტელევიზორში კი, რასაც მოგისჯიან, იმას უნდა უტყვირო, ნერვები მეშლება, კაცო-ო! მერე შინაარსითაც უფრო ბოროტული

და ავყიაა ე ოხერი! ახლა დენი უნდა... დენი კი ხო იცით, კახეთში როგორი იშვიათობაა? ხოდა, მე რადიო მირჩევნია – ფული ფულად მეზოგება და ნერვები – ნერვებად... თამარ, მოდი გენაცვა, ამათ კიდე ყავა მაუდუღე, მე კიდევა პივა და ჩიფსები მამიტანე... მიდი, ქალო, ნულა ინმანნები, ჩასწერე ჩემ ანგარიშზე... ნუ გეშინიან, ჩასწერე, მარინა გაფრთხილებული მყა-ამ!

რა ვქნა, გავაგრძელო?.. ხო-ო, ვირებზე მოგახსენებდით. ისე კი, ვირი რა მოსატანია, ჩვენა, გენაცვა, ადრე კამეჩებით ვიყავით განთქმული. აქა იგრეთი ჰაერია, რო კამეჩი ზორბა და ჯანიანი იზრდება. პატარობაში ბებერ ხარკამეჩზე გადამჯდარი სოფლის ჯოგს მოვერეკებოდი ხოლმე სამხრიჯვრის იალაღებიდან ალაზნის ჭალებისაკენ. მალლა, ბინებში დარჩენილი კაცები კი კამეჩის რძისაგან მანონს ადედებდნენ და ყველი ამოჰყამდათ. კამეჩანთკარის ყველი თელავის ბაზარზე განთქმული იყო. თბილისიდანაც მოდიოდნენ იმის საყიდლად. დღესა, გენაცვა, თელი მსოფლიო რო მაიარო, კამეჩის ყველს ვერსად იშოვნი. პაპიჩემმა მაინც ისეთის გამოყვანა იცოდა, რო შენი მოწონებულ! დიდხან არ აჩერებდა წათხში. ახლადმარილგამჯდარ, რბილ-რბილ თავებს ამაილებდა და ე, ამოდელა ბრტყელ ფიქალზე დაანყობდა. მერმე ემაგ ფიქალს კრამიტდახურული თალარის თავზე შემოსდგამდა, რო ღორი ან ძაღლი არ მიპარვოდა და მზეზე სდებდა. როცა ყველი გარედან შეხმებოდა და ნეკის სიმსხო ქერქს მაიდებდა, ხურჯინებში ჩავანყობდით, ვირს ავკიდებდით და სოფელში ჩავზიდამდით ხოლმე. იმავე დღეს გრილ სარდაფში ხის თაროებზე ვალაგებდით და ზამთრამდე ეგრე ვაჩერებდით... როცა მზეზე გამთბარ და კანშემომხმარ ყველს სიგრილეში დადებ, შვილო, ჯერ სულ დაოფლამს, მერე კი, ნელ-ნელა თელ ამ ცხიმს უკან შაინომს და თეთრი თავი თანდათან ქარვისეფე ყვითელი ხდება. უჰ, მაგი ჭამას რა სჯობია, ბიჯო-ო! რომელი გუდა და სულგუნი! ეგ ყველი, გენაცვა, ყველას კი არ უნდა აჭამო. სიტყვაზე რო ვთქვათ, ხევსური და მეგრელი კი ვერ გაიგებს მაგის გემოსა. ვერც ამერიკელი დააფასებს... ვერც რუსი და თათარი. ეგა, შვილო, უფრო ფრანგს ან გერმანელს უნდა გააშინჯო, ანდა იტალიის ხალხსა...

რა-ა? არა, არც საფრანგეთში ვარ ნამყოფი და არც არსად, ნავარასისკს არ გავცილებივარ... საიდან ვიცი და იქიდან, რომა, თავის დროზე, ილიკო ჯანდიერმა ეგრე თქო. იმას კი არ შეუძლებოდა. ილიკო ჯანდიერი გაგივიათ?.. არა, აბა საიდან!.. ეგა, გენაცვა, დიდი ზოოტექნიკოსი იყო – ჯერთ რიგაში, მერმე კი გერმანიაში და ხოლანდიაში ნასწავლი. ოცდათორმეტი თუ ოცდაცამეტი წელი იყო. მე მაშინ 12-13 წლისა ვიყავი და კარქა მახსოვს. მამიჩემმა ტიტემ ჩამოიყვანა თბილისიდან. მაშინა ილიკო თელ საქართველოში დადიოდა, რძისა და ყველის ხალხურ ტექნოლოგიებსა თუ რაღაც ეგეთსა სწავლობდა, თანაც მთავრობისაგან ყველის ფაბრიკების გამართვა ჰქონდა დავალებული. მამიჩემი კი სოფლის მექანიზაციაში

მუშაობდა და ილიკოს ეხმარებოდა. ზაფხული იდგა. მე და ანიჩკა მალლა, სამხრეთკავკასიის ბინებზე ვიყავით ვანა პაპასთან, როცა ილიკო და ტიტე ამოვიდნენ. ცხენებით იყვნენ. მამიჩემი უნფრო ზორბა ტანისა იყო, ილიკო კი – ჩია და დაბალ-დაბალი. გალიფე შარვალი ეცვა, ქამრიანი ფენჯაკ-ტუყურკა და წვრილი გალუსტიკი. თავზე კეპკა ეხურა. ვანა პაპა გემევეებათ. სხვა მწყემსებიც მოვიდნენ. ილიკო გალიმებული ხელს ართმევდა ყველას სათითაოდ. ტიტე და ვანა დაატარებდნენ სტუმარს, აჩვენებდნენ, უხსნიდნენ, ის კი ლურჯი კარანდაშით რალაცას იწერდა პატარა ბლოკნოტში. ჩვენც დაგვასაქმეს – კოცონის დანთება დაგვავალეს, რო მერე მწვადები შეენვათ მოგვიანებითა. მე და ანიჩკა თან წალამს ვაღვივებდით, თანაც თვალს ვაპარებდით ჩამოსული კაცისკენ, რომელიც პირებ უღებდა ჩვენ კამეჩებსა და შიგ ისე დაკვირვებით ჩასცქეროდა, თითქო ვარსკვლავიან ცასა ხედამდა მაგათ ბნელ ხახაში. მემრე წათხიან სათლებს ჩამოუარა, ხელი ჩაყო, სიმკვრივე მოუშინჯა ყველის თავებსა. ამასობაში ვანა პაპამ დიდ ფიქალზე პურები, ბოლოკი, ნიორი და ორნაირი ყველი დაალაგა: ერთი – ახალი, ჯერ გამოუყვანელი, მეორე კი – შარშანდელი, მკვრივი და ყვითელი. ბებერმა სარქალმა მანონი გადმაიტანა, ახალგაზრდებმა ზაქი დაკლეს. მამიჩემმა ღვინის ტიკი ჩამოხსნა ცხენს. გაიმართა ქეიფი. ხოდა, მაშინ, როცა ილიკომ ვანა პაპას ყველები გაშინჯა, ყველანი გაყურდნენ და მიაშტერდნენ, ისა კი ნელა და საგანგებო გულისყურით ლეჭამდა, თვალები ფიქრიანი და სხვაგან მაცქერალი გაუხდა, გეგონება მეფე ერეკლეა და ქვეყნის ბედსა სწყვეტსო. ანიჩკას გეცინა კიდეც. ის იყო, ტიტე უნდა გასწყრომოდა, რო ილიკომ გაიღიმა და თქო: „ერი-ჰაა! თქვენი ნახელავით მთელი ევროპა შეიძლება გავაკვიროთ. ამ ყველის ფასს შვეიცარლები, ხოლანდიელები და ფრანგები გაიგებენ, – დაახანა და მერე დაამატა: – იტალიელებიც, ალბათ“.

მე და ანიჩკა ქეიფის გახურებას ველოდით, ტიტეს სიმღერას. იცით, როგორა მღეროდა? ცაში გაფრენილი ტოროლები ჩერდებოდნენ მოსასმენადა, მა-აშ. მაგრამ ეგ არის, დედიჩემის სიკვდილის მერე იშვიათად თუ მოვიდოდა ხოლმე სიმღერის იშტაზე, ისიც – ღვინო როცა დასძლემდა, მარტო მაშინა. არც ილიკო იყო ურიგო მომღერალი, ლევან ჯანდიერის შვილი მა რა იქნებოდა! მაგრამ იმ დღეს ქეიფი მაინც არ გამოვიდა – ცოტ-ცოტასა სვამდნენ ხანგამოშვებით, უფრო კი ყველზე ლაპარაკობდნენ: მინსახკომს მივწეროთ, მათიკაშვილსა და გვარამიასო; მოსკოვში რალაც ქალაღები გავაგზავნოთ; ახლა ვანას აიშედებდნენ: „გაისად, აპრილში რო სოფლის მეურნეობის ფესტივალი იქნება პარიჟში, შენი ყველი იქ უნდა მოვახვედროთ და ოქროს მენდალი ჩამოგიტანოთ“. ვანა კი იცინოდა და ეგრე იძახდა: „რავი, შვილო, დაღევით კი თითქო არაფერი დაგიღვენიათ, რო ეგრე აცა-ბაცათა ლაპარაკობთო. რა მენდალი, რი მენდალი, აბა, ამ გაგანია კომუნისტობაში ჯერ თქვენ ვინ გაგიშვებთ ფრანციაში და მერე ამ ჩემ ყველსაო“. ეგრე ავიხდა ყველაფერი!

წერა-კითხვის უცოდინარი იყო ვანა, მაგრამ ალლოიანი. ჭკუითა და გამჭრიახობით ნასწავლ ტიტესა და ილიკოს, ორთავეს ერთად აღებულსა სჯობდა. მაგრამ ეგ მერე გამოჩნდა, რამდენიმე წელიწადში. იმ დღეს კი დაბინდებას არ დალოდებიან, დაილოცნენ, ბაღლები დაგვკოცნეს, შესხდნენ ცხენებზედ და ჯერ კიდე წითლად განათებული იალალიდან დაბლა, ავად ჩაშავებული ლოლუანთ ხევისკენ დაეშვნენ. ხოდა, კაცო, უცნაური რამე მოხდა... არც ისე უცნაური, მაგრამ დამანახსოვრდა კი: იმ დღეის სტომაქივით ჩანყვდიადებული ხევიდან სიმღერა არ მოგვესმა-ა?! როგორცა სჩანს, უნაგირზე რწვევა-ჯანჯღარში ღვინომ თავისი ქნა და ე ჩვენი მხედრები აგვიმღერა. მგონი „გაფრინდი, შავო მერცხალოსა“ მღეროდნენ. თვალით ველარა ვხედამდით, შორ იყვნენ, მაგრამ ხმა ისე კარქა ისმოდა, თითქო სამხრისჯვარს არც გასცილებოდნენ. ჩემი და, ანიჩკა, უცბათ მოსწყდა ადგილსა, მინდვრის ბოლოს, ფრიალოების თავზე გადაკიდულ გოდორა ლოდზე შეხტა და ფრთხილად გადაიხედა ხევიში. პატარა ვიყავ, მაგრამ მახსოვს, სუყველას გულეები გადაგვიფრიალდა – მე და ვანა პაპაც იქით გავრბივართ, ანიჩკასაკენ, გვეშინიან, ემანდ არ გადავარდეს. ის კი არხეინათა დგა ლოდზე და თავის წკრიალა ხმას იმათ სიმღერას აყოლებს. ეხლაც თვალწინ მიდგას, კაცო, თმააბურძგნული, თითისწვერებზე შემდგარი გოგოცუნა, მოჯაჯული ბამბაზიის კაბიდან კნაჭა ფეხები რო მოუჩანს... გაგიკვირდება, ამ ორი წლის წინ რო დამეღუპა, სულ ეგრე ლოდზე მომღერალი მედგა თვალწინ... მაშინ პირგამეხებული ვიყავ, სიტყვა არ დამცდენია... ეხლა რა მამდის, არ ვიცი...

კარქი, ნე მიყურებთ... გამივლის... ამ სიბერეში დამჩემდა... ვანა ვტირი, მაგრამ ე ოხერი ცრემლები თავისთავად ჩამამდიან, გაგიგონია, კაცო?! ცრემლის გარდა ყველაფერი გამიხმა: ხელები, ფეხები, ტვინი... ისე, მართალი რო ვთქვათ, დიდი ტვინისა არც არასდროსა ვყოფილვარ. ანიჩკა? ხო-ო, წარჩინებული ნიჭისა იყო, მე კიდევ – არა. თელი ჩემი ცხოვრება ქაქანსა და ჩიტირეკიობაში გავატარე. წერა-კითხვა ძლივ მასწავლა ანიჩკამა. როგორა? არა, გენაცვა, დედა საიდან? დედიჩემი ჩემ მშობიარობას გადაჰყვა და დავრჩით ეგრე ობლადა. ჩემთვინ ეგ იყო დედაცა და ყველაფერიცა. ოთხი წლით იყო ჩემზე დიდი. მე ოც წელში ვაარ დაბადებული, ეგა კიდე – თექვსმეტში. პატარობიდან ცქვიტი და მაუსვენარი იყო, უცნაურია – ეგრეთი ჭკუიანი და სწავლისმოყვარე როგორ გამოვიდა ე მამაძალლი!

ანიჩკა რვა წლისა იყო, მე კი ოთხისა, როცა კახეთში აჯანყება დაიწყო. ქაქუცა ხო გაგიგიათ? ხო, ქაქუცა ჩოლოყაშვილი. თავდაპირველად უფრო მატნისა და ლალისყურის ტყეებში იმალებოდნენ მაგისი ბიჭები. ამ ჩვენი სამხრისჯვრიდან ნახევარი დღის სავალიც არ არის მატნამდე. ხოდა, თურმე, პაპიჩემი აბგაში ხმიადებს, ყველსა და მანონს ჩაუნყობდა ხოლმე ანიჩკას და გადაღმა ხეობაში ატანდა ქაქუცას რა ზმელებისთვინ. ენდობოდა და იმიტომ,

იცოდა მაგისი ქკუს ამბავი. ერთხელაც მდევარს გადასწყდომია ე ჩემი და. აკი გითხარით, პატარაა, კაცო, რვა წლისა. სამხრიჯვარი გადაუვლია, ბექობს ჩაჰყოლია, საძოვრები ჩაუმთავრებია, ხოდა, ის არის ტყეში უნდა შავიდეს და აბგა სამალავში მიიტანოს, რო ფლოქვების თქარათქური მეესმა. არ დაბნეულა ე თითისტოლა გოგო – სანოვაგე სადღაცა ქვის ქვეშ დაუმალავს, როგორც პაპამ დაარიგა, ზედ ხმელი ფოთლები მიუყრია, თითონ კი ნკეპლამომარჯვებული დახვედრია მილიციასა. ათნი ყოფილან. წინ დიდ, შავ ცხენზე გადამჯდარი მალაქია ინაკავაძე მოუძღვით – კახეთის მილიციის უფროსის მოადგილე, ორმეტროიანი, ცალთვალა პირუტყვი. მაგისი გამორჩენა შიშის ზარსა სცემდა თელ აქაურ მოსახლეობას. დგაა ანიჩკა, გამხდარი, გაკნაჭული და უყურებს ბაყბაყდევით თავსწამომდგარ ინაკავაძეს. ის კიდე, ტყავის ლაპლაპა, შავ ტუფურკაში გამოწყობილი, უნაგირზე წამოხორხლილა და თავისი ცალი თვალით ზემოდან ბურღამს შაშინებულ ბაღლსა. „აქ რას აკეთებ, პატრონი არა გყამსო?“, – ასე უკითხამს. „ჩემი პატრონი ვანა პაპაა, მე კი დაკარგულ ხბორებს ვეძებო, – ანიჩკას უთქვამს, – სამხრიჯვრიდან გაგვექცენენ და უნდა ვიპოვო“. „ვერა გყოლია კარქი პატრონიო, – გასცინებია ინაკავაძეს, მაგისი შავი ცხენიც ახვიხვინებულა, – ამ სიშორეზე როგორ გამოგიშვა პაპაშენმაო?“ ისევ ახვიხვინდა ოდროგელა ულაყი. „საშინელი ცხენი იყოო, – მერე ყვებოდა ანიჩკა, – შავი, შავი, კუნაპეტი, კისერზე ირიბი ნაჭრილობევით, თანაც გიჟურად ატრიალებდა წითელ თვალებს და ბრაზიანად სცემდა ტაშისხელა ფლოქვებსაო“. საღამოთი ჩაფსმულ-ჩასველებული დაგვიბრუნდა პატარა გოგო, მაგრამ ვანას გატანებული სანოვაგე მილიციის წასვლის მერე მაინც მიეტანა სამალავში და იქ დეეტოვებინა. მამა! ეგრეთი ბაღლი იყო.

მე რო მისმინო, შვილო, ხვალ დიღამდე ვიყბედებ, არკი მამბებრდება. ცალხელა კაცს მეტი რა საქმე მაქ? გონი სხვა რამე მკითხეთ, მე კი ვრატრატებ ცარიელი კასრივითა. პატარობიდან სუ ეგრე ვიყავი – ერთსა მკითხამდნენ და სხვასა ვყვებოდი. ნეტა ვის რაში ეინტერესება ან ჩემი სანყალი და, ან კიდე ინაკავაძე? რა ვქნა, გავაგრძელო-ო?

აი, თქვენა, შვილო, დაბლიდან რო ამაიარეთ, დიდრონი სახლი ხო შაგვცდათ წყაროსთანა? უთუოდ შაამჩნევდით – ძველი სახლია, სტოლებზე დაფუძნებული ხის აივნითა, ბაღკომს რო ვიტყვით, მოჭიკჭიკებული თამასებითა და მოაჯირებით. ხო, საკრებულო და ამბულატორია რო არი... ეგა, გენაცვა, ერისთავიანთ სახლია. ძია გიორგის მანდა ჰქონდა საკვირაო სკოლა გახსნილი ხელმოკლე ოჯახის ბაღლებსთვინ. ძია გიორგი და ძალო ელისაბედი წერა-კითხვას ასწავლიდნენ სოფლის საღახანებსა. ეგენი რო არა, მამიჩემს რა მაახვედრებდა თელავის რეალურ სასწავლებელში! ტიტკოსთვის მონდომება და გამჭრიახობა რო შაუმჩნევია, გიორგი თავისი ფეხით მოსულა ჩვენ ოჯახში და პაპიჩემი დაურწმუნებია, ბაღლი

ნახირისათვის მიემორებინა და ქალაქს გეგზავნა სასწავლებლადა. ფულითაც დახმარებია. აბა, პაპიჩემს რა ფული ექნებოდა, ერთი უბრალო მესაქონლე იყო.

დიდი კაცი იყო ცხოვრებული გიორგი. ოცდაოთხ წელში კომუნისტებმა დააპატიმრეს ღრმად მოხუცებული. ვილაცა ოხერმა ინაკავაძეს ენა მიუტანა, ერისთავიანთ სახლში ჩოლოყაშვილების რაზმელები ათევენ ღამესაო. სწორედ ღამით მოლაგდნენ მილიციები. მართალია, სახლში ვერავინ ნახეს მოხუცი ცოლ-ქმრის გარდა, მაგრამ გიორგი მაინც წაიყვანეს თელავის ციხეში და მერე ეგ საცოდავი ცოცხალი აღარავის უნახამს. დაკითხვას ვერ გაუძლო და გული გაუსკდაო, ეგრე გავიგეთ. ვინ იცის, სცემდნენ კიდევ. მალაქია ინაკავაძე მა რას იზამდა?! ყველაფერთან ერთად, ლოთიცა ყოფილა ეგ შობელძალდი. არყით გალექებული, ღამლამობით ტუსალების ცემითა და ტანჯვა-წამებით იქცევდა თავსა... ამის მერე აღარც ელისაბედს უცხოვრია დიდხან. ისედაც სუსტი ქალი იყო ცხოვრებული, სიფრიფანა, კულტურული. აბა, ეგრე ერთბაშად მოზღვავებულ დარდს რას გაუძლებდა?! გამწარდა თელი კამეჩაანთკარი, თელავი, საზოგადოდ, კახეთი. ქაქუცა დასაბმელი გამხდარა, დაუფიცნია, შურს ვიძიებო. ხოდა, გენაცვა, მოენე მიუგზავნიათ მალაქიასათვის, ვითომც ჩოლოყაშვილი ლალისყურს ზემოთ, ძელქენარი როა, იქა დგაა ბანაკადაო. მოტყუვდა ინაკავაძე, დიდი რაზმით წამოვიდა. ბიჭებმა სროლა-სროლით გაიტყუეს ძელქევებს ზემოთ, საძოვრებისაკენ, საცა ხელისგულივითა ჩაანს ყველაფერი; ზეიდან და ქვეიდან გზა მოუჭრეს, ალყა დაარტყეს და დასცხეს. იმ დღეს განყდა თითქმის თელი კახეთის მილიცია.

ჩვენა კიდევა, არხეინადა ვართ ქედს გადმოღმა, სამხრეთის ბინებზე. არც ვიცით, რა ცოდო-მადლის განკითხვაა ლალისყურთან. ზაფხულია, კაცო, ჭრიჭინებს გაუდით ტკარცალი. ვანა პაპა და ანიჩკა მზეზე გამთბარი წყლით მახანავებენ ლახანკაში. პატარა ვარ, ოთხი წლისა. თურმე ფეხებ წყალში ვატყაპუნებ და ვწუნამ ვანასა და ანიჩკასა. „ნელა, შე ზაქო“, – იძახის ვანა. უცბათ, ჭიხინი ვის გაუკვირდება, მაგრამ ის რალაცა გამაყრუებელი და თავზარდამცემი იყო, გრგვინვასეფე. გავიხედეთ და რასა ვხედამთ? ლოლუაანთ ხევის მხრიდან ვეებერთელა შავი ულაყი ამოვარდა; მოჭქრის გაგიჟებული და მიწას აზანზარებს, წითელი ღამ-პირიდან თეთრი ქაფი გადმოსდის, მოვერცხლილ უნაგირსა და ფერდზე კი სისხლის კვალი დაჰყვება. რა თქმა უნდა, ანიჩკამ იცნო ინაკავაძის ცხენი, რალაცა უთხრა პაპასა და ორთავენი იქით გაიქცნენ. მე ვილას ვახსომდი, ჩამტოვეს ეგრე ტიტველი ლახანკაშია.

როდის-როდის მობრუნდა ანიჩკა, ამამიყვანა ატირებული, კალთაში ჩამისვა და ახლად გარეცხილ-გამზეურებული ფქვილის ტომრით დამიწყო გამმრალება. თან მანყნარებს: „ნუ სტირი, ბიჭო, სირცხვილია,

დაგინახამენო“. მე კი, თურმე, ლაპალუპით ჩამამდის ცრემლები, თან ცალი თვალითა ვხედამ, როგორ მოჰყამთ ვანასა და კიდევ ორ-სამ მწყემსს დაფლეთილ-დასისიხლიანებული, უგონო ინაკავაძე. იქვე, ლოლუაანთ ხევში, ჩავარდნილი ეპოვნათ. რაკი სისხლით გაჟღენთილი ტანისამოსი არა სცილდებოდა, დუქარდით გაუჭრეს პერანგი, ჩექმები და გალიფე, ტყავის ფენჯაგი გახადეს და მერე სახელდახელო საკაციდან ხის იაშჩიკებზე გადმანვინეს. მე და ანიჩკა სულგანაბული ვუყურებდით, როგორ სწმენდნენ არყიანი ჭინჭებით ნატყვიარებსა და ფიქლებზე დავარდნისას გადაფლეთილ ალაგებს. პირველადა ვხედამდით გატიტვლებულ, ბოდიში მომითხოვია და, საოხრეგადმოგდებულ კაცსა. საზიზლარი და საშიშარი სანახავი იყო ინაკავაძე. თუმცა ე ვებერთელა, ბანჯგვლიანი მძორი ჩემთვინ არც ინაკავაძე იყო, და არც საერთოდ ადამიანიშვილი – მაშინ, იმ ხის იაშჩიკებზე ადამიანის მაგივრად თელ ტანზე სისხლისგან ბალანშანებებული, დაჭრილი მხეცი ეგდო. „რას დაგიყვლებნით თვალეზი, გადით აქედანაო!“ – თავზე ისე დაგვიკვილა ბებერმა სარქალმა, რო ორთავენი შავხტით. ანიჩკამ თვალეზზე ხელი ამაფარა და ისე გამარიდა მანდაურობას, გეგონება, თითონ ძალიან ბევრის მნახველი ყოფილიყო... ვინ იცის, ამ ხელის თვალზე დაფარებით ხალხის ყურადღება ჩემზე უნდოდა გადმეეტანა ანიჩკას, რო თავისი ელდა და სირცხვილი დემალა. რისი სირცხვილიო? რავი აბა, იქნებ იმისი, რო დროულად თვალი არ მაარიდა, რო სხვებმაც შეამჩნიეს, რა გამტერებული დაჰყურებდა უსირცხვილოდ გათხლაშულ ოყლაყსა... ჩემი მოკლე ჭკუითა ვფიქრობ, რო იმ დღიდან თელი საკაცეთის შიში და ზიზლი დიდხან გაჰყვა ანიჩკასა, ამიტომაც ძრიალ დაავიანა გათხოვება. შაყვარებულ ბიჭებს ბუზებივით იგერიებდა და თან იგრე უკმეხად და ბრაზიანად, რო ვინლა გაუბედამდა ხელის თხოვნასა? გენაცვათ, გერმანიასთან ომი უკვე დამთავრებული იყო, როცა, როგორც იქნა, ცოლად გაჰყვა ბოჩია პაჩკორიას.

მოკლედ, ეგრეთი იყო იმ დღის ამბები. სალამოზე კი ცხენოსნები მოვიდნენ, ქაქუცასები. მგონი, ხუთნი იყვნენ. ჩოხები ეცვათ. ვანამ სახელდახელო პურმარილი გაშალა, არყის ბოთლიც დადგა და სტუმრები მიიპატიჟა. დინჯად საუბრობდნენ, დილანდელი სროლის ამბავსა ყვებოდნენ. „სულძალი ინაკავაძე მგონი გაგვექცაო, – თქვა ერთ-ერთმა, – სამი ტყვია მოვარტყით და ლოლუაანთ ხევში გადავარდა, მაგრამ მოგვიანებით შიგ ჩასულებმა ველარც ცოცხალი ვნახეთ და ველარც მკვდარიო“. რას იფიქრებდნენ, რო კახეთის მილიციის უფროსის მოადგილე, ჭრილობებდაბანილი და გადახვეული, იქვე, ფარეხში ეწვინა ვანას. მაგისი მიბაძვით არც მწყემსებს დასცდენიათ სიტყვა. ბევრჯელ მიფიქრია, ეგ ჯალათი და ქვეყნის ამამგდები რათ არ გასცა პაპიჩემმა? იქნება გულმა არ გაუშვა, ისედაც სიკვდილის პირას მყოფი კაცი მოსისხლეებისთვინ რო ჩეგდო ხელში? ან იქნებ თავისი გლახური ჭკუით მიხვდა, ვის დარჩებოდა საბოლოო გამარჯვება და კომუნისტებთან არ გაიფუჭა საქმე. შეიძლება

ერთიც იყო და მეორეცა. რას გაიგებ? ასე იყო თუ ისე, ვანამ წყნარად გაისტუმრა ქაქუცას ბიჭები. სამ დღეს თუთუნში არეულ ბალახებს ადებდა და ანწლის ნაყენს ასმევდა დაჭრილს. სამი დღის მერე კი მილიცია მოვიდა და სიცხისგან გათანგული ინაკავაძე ჯერ თელაველი, მერე კი თბილისელი ექიმების ხელში აღმოჩნდა. კახეთში აღარ დაუბრუნებიათ, იქვე, თბილისში დაიტოვეს. მერელა გავიგეთ, რო თურმე ენკავედეში დეენიშნათ...

თქვენა, შვილო, პივას რად არა სვამთ? თუ ღვინო გირჩევენიათ? არც ღვინო-ო? ე ჩიფსები მაინცა სჭამეთ, აბა, სუ ყავა და ყავა რა არი?.. რა გინდა, თამარა, შენ რასა ჯაჯღანებ? თუ დაილაღნენ, რა, თითონ ვერ მეტყვიან?! არა ვარ, ქალო, თვრალი, აბა, სად გინახამს, რო პივას კაცი დეეთროს? კარქი, ნუ გაანუხე გული!..

ხო-ო... მე უკვე სკოლას ვამთავრებდი, როცა ტიტეს დაჭერის ამბავი მოვიდა კამეჩანთკარში. ჩემი და იმ ხანად თელავში სწავლობდა საფერშლო კურსებზე და ბინად ელიჩკა ვახვახიშვილთან იდგა. ელიჩკას დედა ჩვენი გვარის ქალი იყო და შორეულ ნათესავადაც გვერგებოდა. მახსოვს, საახალწლოდ და საალდგომოდ მე და ვანა ყველით, ქათმებით, დედას პურებითა და ქადებით დავტვირთამდით ხოლმე ურემსა, ჭრიალ-ჭრიალით გავივლიდით თელავის ლაფიან გზას და საღამოზე მივადგებოდით ვახვახიანთ სახლსა ნადიკვრის მახლობლად. თითონ ელიჩკა გაუთხოვარი, ალვის ხესავით სწორი და მალალი ქალი ბრძანდებოდა. გასაბჭოებისთანავე ორი ძმა და სიძე დაუხვრიტეს და იმათი შვილები მაგასთან იყვნენ თავშეფარებულნი, სულ სამი გოგო და ორიც – ბიჭი. აბა, წარმადგინეთ, რა გნიასი და მხიარულება იდგა ვახვახიანთ ჭირგადახდილ სახლში. ე ჩემი ობოლი თამარიც იქ გავიცანი, ეგეც იქ იყო შაკედლებული. ბაღლობიდან ენა ებმება და ლაპარაკი უჭირს უბედურსა, თორე ისე განა სულელია, ნუ გეშინიან, ჩემზე მეტი ჭკუა ააქ თავში. ანიჩკა კი მაგათში მგონი ყველაზე უფროსი იყო, ოცდაერთი წლისა. თან კურსებზე სწავლობდა და თან საავადმყოფოშიც მუშაობდა სანიტრად. ყოველ ჩამოსვლაზე ჩუმად ჩამიკუჭამდა ხოლმე ხან სამ მანეთს, ხან უფრო მეტსაცა. ელიჩკა ვახვახიშვილი იძახდა, ანგელოზი გამამიგზავნა ღმერთმა, უმაგისოდ ამ გადარეულ ახალგაზრდობას როგორ მოვმწყემსამდიო. ცოტ-ცოტას დაკვრასაც ასწავლიდა. „ამისი სმენისა და ხმის პატრონს, რა უნდა საფერშლოზე, ტიტეს უნდა ვუთხრა, თბილისში წაიყვანოს და ოპერაში მიაბაროსო“, – ეუბნებოდა ხოლმე პაპიჩემსა. მაგრამ, აბა, სად ეცალა ტიტეს ჩვენთვინა, საქვეყნო საქმეებზე დადიოდნენ ეგა და ილიკო ჯანდიერი, ფერმებს ამენებდნენ თელ საქართველოში, უცხოეთიდან რაღაცა მაშინებისა და მოწყობილობების ჩამოტანასა ცდილობდნენ. არც კამეჩანთკარული ყველი დავინწყნიათ – იმის წაღება უნდოდათ საზღვარგარეთ და ვერ კი ახერხებდნენ, სუ რაღაცა უშლიდათ ხელსა. რაღა



ბევრი გავაგრძელო და, ოცდაჩვიდმეტ წელს გორში დაიჭირეს ორთავენი. მერე გავიგეთ, რო თურმე მათიკაშვილი და გვარამიაც დეექირათ, იმათთან ერთად კი – თელი მინსახკომი. დიდი ამბავი იყო ატეხილი, გაზეთებშიაც სწერდნენ.

...დეკემბერი იდგა, ციოდა. ხანდისხან გადმაუშვებდა მეჩხერ ფიფქებსა და მერმე ისევ გადაიღებდა. გუბეებში წყალი გაყინულიყო, თოვლი კი მაინც თხლად და კანტიკუნტად ეფინა გაქვავებულ ლაფსა და დამჭკნარ ფოთლებს. მე და ვანა უხმოდ ვიჯექით ბუხართან. მეზობლებიც უხმოდ შემოდოდნენ. ზოგს კირკაჟი ლობიო შემოჰქონდა, ზოგს – მოხარშული კარტოფილი და ლორი, პანაშვიდის დროს რო იციან ხოლმე, ისე. ვანა კი იჯდა ეგრე უბრად, დიდრონი მტევნები მუხლებზე დეელაგებინა და გაშტერებული დასცქეროდა მინავლებულ ნაკვერჩხალს. სალამს არავის აძლემდა. არც მომსვლელები ინუხებდნენ თავს საუბრითა – ორ წუთს დადგებოდნენ კედელთან, მერე გააქნევდნენ თავს, ჩუმად დაზდებდნენ სტოლზე მოსაკითხსა და ისევ ისე გადიოდნენ კარში. ეშინოდა ხალხსა... მე რო ლაქლაქი არ მეზარება, თქვენც კარქათა ხედამთ. იმ დღეებში კი სუმთლად ეშმაკი შემეჯდა, ისრე მამინდა ვინმესთან დალაპარაკება, მაგრამ პაპიჩემის შემხედვარე, რას გავებდავდი ყბედობას, ძალად ვაკავებდი პირზე მომდგარ სიტყვებსა. არადა, ენა მექვებოდა და თელი ხორხი მტკიოდა ვერნათქვამი სათქმელისაგან. ეხლაც არ ვიცი, რა მქონდა სალაპარაკო გინების გარდა, რალა თქმა უნდა.

იმ ყოფაში ვიყავით, რო ჩვენ ლობეს ეტლი მადგა. იქიდან აცრემლებული ანიჩკა გადმოვარდა და ჩემკენ გამეექანა გულამომჯდარი. გავიხედე და ელიჩკა ვახვახიშვილი და მაგისი ძმისწული, ელიზბარაც არ გადმოდია-ან?! მაგათთვის უხიფათო რო არ იყო ესრეთ დროსა და ვითარებაში ჩვენ ოჯახში მოსვლა, რად უნდა ლაპარაკი! მარტოკინა მაინც არ გამოუშვეს ჩემი და... წარმოიდგინეთ, არც თელაველ სტუმრებს გამეეგება ვანა. ერთადერთი, როცა ოთახში შემოლაგდნენ, ფეხზე წამოდგა და ხელი ჩამაართვა. დავსხედით სკამებზე. ელიჩკამ ფუთას თავი მოხსნა და იქიდან თბილი საცვლები, წინდები და ნაქსოვი ხელთათმანები ამაალაგა. მერე პაპიჩემს გახედა და თქვა: „ვანა, თბილისში უნდა ნახვიდე. ბიჭს თბილები დასჭირდება; მეტადრე – თუ გააციმბირეს... ამ ქალაქს კი ენაკვედეში დასტოვებ. შეწყალების თხოვნაა. მე დაგინერე. შენ მარტო ხელი მანერე და კანცელარიაში მიიტანე, ოლონდაც გააკონტროლე, ჟურნალში გაატარონ და ზედ ნომერი დაასვან.“

ელიჩკა და ელიზბარი იმ დღესვე თელავში გაბრუნდნენ, ჩვენ კიდე შავუდექით სამზადისსა. გადავწყვიტეთ, ანიჩკა სახლში დეგვეტოვებინა. კაცო, ადრე გვინდა დაწოლა – მეორე დღეს თბილისს მივდივართ. უეცრად კარზე კაკუნია. დავიზაფრეთ, არავის ველით ამ დროსა. ფრთხილად გამოვალე კარი. ვხედამ, მეზობელი კაცია, ნაჯიბგირალ-ნაციხარი. ჯერთ

მენშევიკებმა დაიჭირეს თბილისში ჯიბის ქურდობაზე, მერე ახლა – ბოლშევიკებმა. არც გამეგო, როდის დაბრუნდა კამეჩანთკარში. ღელაღლუტას ვეძახდით, ერთი არეული და ღვარძლიანი ვინმე იყო. „ტიტიკოს ამბავი მითხრეს, ძალიან მენყინაო“, – ასე სთქვა. მერე ბუშლატიდან არყის ბოთლი გამააძვრინა: – „ვიცი, გზაზე დგეხართ და მინდა გზა დაგილოცოთო“. არ ეამა ვანას, მაგრამ რას იზამდა? ანიჩკამ ყველი, წნილი და პური დაალაგა. „მე ციხისა ყველაფერი ვიცი, პოლიტიკურებთანაც ვარ ნაჯდომიო“, – იძახის ღელაღლუტა. „ხმელა არყის სმას, გირჩევნია რამე მიაცოლოო“, – პასუხობს პაპიჩემი. „არა გჯერა, ვანა ძია, რო მართლა პოლიტიკურებთანა ვარ ნაჯდომიო, – არა ცხრება ე ოჯახაშენებული, – ჩვენა მაგათა კონტრიკებს ვეძახდით. ისე კი ძრიალ გვეცოდებოდნენ, როცა დაპროსიდან ნანამებს შამააბრუნებდნენ. ვუვლიდით, ჭრილობებსაც ვუხვემდით ხოლმეო“. „ნანამებსაო?“ – წარბი ასწია ვანამ. „მამა, კაცო, როგორღა არ ანამებენ მაგ უბედურებს. დაპროსის ოთახში წყლიანი ვედრო დგაა, შიგა კიდევა ბანარშამოხვეული ჯაჭვი გდია. ჯერო იმითა სცემენ გატიტვლებულებსა, მინამ ზურგი და ტრაკი ხინკლის ფარშივით არ გაუხდებათ, მერე კი იმ ვედროდან წყალს დაასხამენ გულწასულს, რო უარესი წამებისთვინ მაიყვანონ გონზედ. ზოგი გამომძიებელი ნაცემ ადგილებზე პაპიროსებს აქრობს, ზოგი კი კლემჩებსა ხმარობს ფრჩხილების ან კბილების დასაძრობადაო“. გაეხედე ვანასა... პირი მაუმუნამს, სახე სუ დასწითლებია, თვალები კი ნელ-ნელა ემღვრევა. ანიჩკა კი პირიქით, გათეთრებულია და ქვედა ყბა უკანკალებს. მუშტი დასცხო მაგიდას ვანამა და ამაიხრიალა: – „რეებსა ჩმასამ, შენ თავი ხო არ მოგძულებია, ბაღლოო!“ ის კიდე არა ცხრება და აგრძელებს ბრიყვულადა: – „არ გატყუებ, შენმა მზემ, სუ მართალს გიყვები. ეგ რა არი, უარესს გეტყვი, ერთი ყოფილი რაიკომის მდივანი პისმენი სტოლზე ხელის მტევენებით მიაღურსმეს და ცხელი შამფურები ურტყეს, უნივერსიტეტის პროფესორს კი იქვე გაუსკდა გული, როცა ბოთლზე სვამდნენო“. აქ უკვე დავინახე, როგორ ამასხა ვანა პაპას, არც ამდგარა, ისე სთხლიშა ცხვირ-პირში გაშლილი ტორი. მძიმე ხელი ჰქონდა ვანასა; სკამიანად გაფრინდა ღელაღლუტა, ზურგით კედელს მიენარცხა და მერე დეეხეთქა პოლზე. „დახე ამ შობელძაღლს, კალოშებიც არ გაუხდია, ისე შამამივიდა სახლში! გაათრეე აქედანაო“, – ბრდღვინამდა ვანა. კალოშებიო, კაცო, გესმით თქვენა?! მერე, ჭიშკრამდინ რო მივაცილებდი ოდნავ გონზე მოსულ ღელაღლუტას, გულში ღმერთსა ვთხომდი, ნეტა არ შაიგინოს, თორე რაც ვანამ დააკლო, იმას მე დავუმატებ-მეთქი. ის კი სულელივით იმეორებდა: „ნეტა რა ბზიკმა უკბინა პაპიშენს, მე გზის დასალოცად მოვედი, ეგ იყო და ეგაო...“

თბილისში კი უცნაური რამე მოხდა. ვაგზლიდან ჯერ პირდაპირ ენკავედემი მისვლა გადავწყვიტეთ შეწყალების წერილის დასატოვებლად, როგორც ელიჩკამ დაგვარიგა, მერე კი – მეტეხის ციხეში. მაგრამ როგორ

გინდა, რასმე მიაგნო ამოდოლა ქალაქში? გამვლელებს ვაჩერებთ, ვეკითხებით ენკავედეს გზასა. მაგათი დამფრთხალი სახეები არ მაინცდება, ხმას დაბლა უწმენდენ და ისე გვისხნიდნენ, კაცო-ო! ერთი-ორმა უკმეხად მოგვიცილა თავიდან, ვინ იცის, დანოსჩიკები ვეგონეთ. ვიარეთ ასრე, ხან ტრამვაითა და ხანაც ფეხითა. თოვლის ნასახი არ არის თბილისში, ხანდიხან წუნკალი ქარი წამაუბერამს მტკვრიდანა და ძვალ-რბილში ატანს. მივედით, როგორც იქნა. გავიხედეთ – გრძელი რიგი დგაა რკინის მესრის გასწვრივ. აურაცხელი ხალხია. შანუხებული და მოლუშული სახეები აქვს ყველასა. ერთმანეთში არავინ ლაპარაკობს. ხანგამოშვებით ხიშტიანი სალდათები გასხნიან მძიმე ჭიშკარს, შაუშვებენ ხუთ კაცს, ისევ ისე დახურამენ. სხვა რა გზაა, ვდგავართ, ველოდებით ჩვენ რიგსა. ზოგჯერ ჭიშკარი ხალხის შესაშვებად კი არ იხსნება, არამედ გარედან მომდგარი მანქანის გასატარებლად. უკვე თითქმის მისულები ვართ, რო ერთიც ვნახოთ, შავმა მანქანამ ჩავვიარა და ალაყაფთან გაჩერდა. ვდგავარ დაპატარავებული და მხრებდავიწროებული ვანას გვერდითა და ფიქრიც კი არ მინდა იმ ხალხზე, ვისაც ეგ მანქანები ემსახურება. ჩვენ სხვები ვართ და ეგენი კი სულ სხვანი – ძალის ბეჭედდასმულნი, ყოვლისშემძლენი და საშიშარნი! გახედვაც კი არ შამიძლია მაგათკენ, ემანდ ზედმეტად არ შავეჩხირო თვალში, რითიმე არ მივიქციო ყურადღება, თავში კი სუ ღელაღუტას მონაყოლი მიტრიალებს... მე იმათკენ არ ვიციქირები, გენაცვა, მაგრამ მთელი ტანითა ვგრძნობ, როგორ დაჟინებით გვაკვირდება მანქნიდან ის ვილაცა კარაკულისფაფახიანი უფროსი, რომლის სახესაც ვერა ვხედავ და არც მინდა დავინახო. სისხლი მეყინება ძარღვებში, კაცო-ო! რა უნდა ნეტა, რას მოგვჩერებია ე დალოცვილი?... როგორც იქნა, გაიღო ალაყაფი, შიგ შასრიალდა ოხერი მანქანა და მეც ამავისუნთქე. გავხედე ვანასა. არაფერი შაუმწნევია. თავისთვინ დგაა დარდიან ფიქრებში წასული და ხანდიხან ჭალარა წვერზე ისვამს ხელსა...

ცოტა ხანში ახალგაზრდა აფიცერი გამოვიდა ჭიშკრიდან და პირდაპირ ჩვენკენ არ გამეემართა?! პაპიჩემს ეკითხება, ესენი და ესენი ხაართო? ხოო, მიუგო გაოცებულმა ვანამა. „ორივენი წამომყვევითო“, – გვითხრა და წინ გაგვიძღვა. უმალ უკაცრიელ ეზოში აღმოვჩნდით და აგურის სამსართულიანი, ყვითელი სახლის შესასვლელს მივადექით. იარაღიანი დარაჯები ეჭიმებიან ამ ჩვენ აფიცერსა, რკინის კარებებს ხსნიან. ახლა კიბეს ავუყვევით, მეორე სართულზედ აველით, ბნელი დერეფანი გავიარეთ და რომელიღაცა კართან ავიტუხეთ. აფიცერმა შიგნით შაიხედა, მერე გვერდზე გაინია და გვითხრა: – „შედით, რალას უცდითო“. ვანას გადავხედე. ისევ ისე მშვიდად და აულელვებლად უჭირამს თავი. გულისფანცქალით შევყვევი. წაგრძელებულ ოთახში აღმოვჩნდით. სუ ბოლოში, მაუდგადაფარებული მაგიდიდან ენკავედეს ფორმაში გამონყობილი ვეება კაცი წამოდგა და ჩვენკენ წამოვიდა. მარჯვენა თვალი გაფუჭებული აქვს, შუბლზედ

ნაჭრილობევი ემჩნევა და ოდნავა კოჭლობს ცალი ფეხითა. მალაქია ინაკავაძეა! აღარ ვიცოდი, შიშისგან ჩემფესა თუ გამხარებოდა. ხმაურით გამოგვინა სკამები, დაგვსხა და თვითონაც ჩამოჯდა. „ვანა, გილოცამ. შენი შვილის საქმე ცალკე გამოყვეს და ტროიკა ამ დღეებში რვა წელს მიუსჯისო, – ასე გვითხრა, – რა იყო, არა ხარ კმაყოფილიო?“ აბა, რომც არა ყოფილიყო კმაყოფილი, რა უნდა ექნა? პირველად ვნახე პაპიჩემის თვალზე ცრემლი. „ღმერთმა ააშენოს შენი ოჯახიო“, – ამაილულლულა ვანამ და ხელზე წეეტანა საკოცნელად. მალაქიამ არ დაანება და სთქვა: „მე კი არა, შენ უნდა გითხრას მადლობა ტიტკომ. წადით ეხლა და მაინცადამაინც ნუ ილაპარაკებთ ამ ჩვენი შეხვედრის შესახებ. ეგ ფუთები კი აქ დამიტოვეთ, მე შევეუბავანი ციხეში, თორე მანამ თქვენ პერედარჩის უფლებას მოგცემენ, ერთი თვე გავაო.“

ილიკო ჯანდიერი და თელი მინსახკომი ახალი წლის დადგომამდე დახვრიტეს. მარტო ტიტე გადარჩა მალაქიას მეოხებით და მგონი, კიდე ერთი მდივანი ქალი. ცხოვრება გაგრძელდა. ელიჩკა ვახვახიშვილმა ცხვრის ყაურმის კეთება ასწავლა ჩემ დას და იმას ვუგზავნიდით ტიტეს მარდოვსკაია აესესერში, საცა იყო გადასახლებული. ყაურმა, გენაცვა, მაგრად მოშუშული და ძვლებგამოცლილი ხორცია, რომელსაც ცოტა ნიორს, დაფნის ფოთოლსა და შავი პილპილის მარცვლებს უმატებ, ზეიდან კი მოთუხთუხე ცხიმს ასხამ და ხუფამ. მგზავრობას კარქა უძლებს, თავისივე ცხიმი ინახამს და არა ფუჭდება. კიდე, ცხადია, ბლომად ჩურჩხელებსა და ჩირსაც ვდებდით პასილკაში. „ვითამინები არ მაკლოთ, თორე უთუოდ ცინგა გაუჩნდებაო“, – ამბობდა ელიჩკა... ათასში ერთხელ მამიჩემის წერილიც მოგვდიოდა ლაგერიდან.

ამასობაში ანიჩკამ კურსები დაამთავრა და დაგვიბრუნდა კამეჩანთკარში. ჩვენ ამბულატორიაში დაიწყო მუშაობა ექთნადა. იძახდა, ამ ორ-სამ წელიწადში ცოტა ფულ რასმეს დავაგროვებ, მასწავლებლებთან კერძოდ მავემზადები და საექიმოზე შავიტან საბუთებსაო. მე კი დავრჩი ასე უსწავლელადა. ტიტე ზოოტექნიკურზე მიპირებდა გამწესებას, მაგრამ აბა, დაიჭირეს და რალას ვიზამდით. რაკი არც სიბეჯითე მქონდა და არც განსაკუთრებული ქკუა, დიდად არ მიდარდნია. სკოლაც სამადლოდ დაწერილი სამიანებით დავამთავრე. ცოტა ქართულსა და ისტორიაში არა მიშამდა. ტლუ სოფელელად ჩემი დარჩენა ვანას არა სწყენია. პირიქით, მგონი გეხარდა კიდეც, რადგან ნასწავლ-განათლებული ილიკოსა და ტიტეს მაგალითი წინა ჰქონდა და ხვდებოდა, რო დანინაურებულ და გამოჩენილ კაცს იმ დროში მეტი ხიფათი ემუქრებოდა, ვინემდის ბოგანოსა და უცოდინარს. თითონ კი ერთი უცნაურობა დასჩემდა პაპიჩემს...

კაცო, მართლა ხო არ დაილაღენით? მითხარით, შვილო, ნუ მამერიდებით! არა? რავი, მაგის დედა ვატირე, დროა ისეთი, რო ყველა

ჩქარობს. ამბის მამყოლი ბევრია და მამსმენი კი, აბა, რა გითხრა... ხო-ო, იმას ვამბობდი, უცნაურობა დასჩემდა-მეთქი. იმ დღეს, ინაკავაძისაგან გამოსულეხს, მაგრა მოგვშივდა. ქალაქში გასაჩერებელი არსადა გვქონდა, ამიტომ უკან უნდა გავბრუნებულიყავით. ჯერ მატარებლით გურჯაანამდე უნდა გვევლო, მერე კი ორცხენიანი ლინეიკით – კამეჩაანთკარამდი. ვანამა თქვა: – „ამოტოლა გზაზე მშვივრები დავიხოცებითო“. ჩვენც მანდვე, ვაგზლის მედნაზე, რალაცა პატარა დუქანი ვნახეთ და იქ ჩავედით დასანაყრებლად. დუქანში ოხშივარი იდგა – ხაში მეხარშათ იმ მამაცხონებულეხს. პატარა მაგიდასთან დავსხედით, კუთხეში მოქეიფე იმერლები მახლობლად. თელი დღის გაყინულ-გათოშილებს ცხელი ხაში გვეამა და ზედ ას-ასი გრამი „ხლებნი“ არაყიცა ვსთხლიმეთ. თვალებდანითლებული იმერლები კი მღეროდნენ: „ბულბულის ენა, ვარდის სინაზეო...“ ისე მღეროდნენ, დალოცვილები, რო დამავინყდა, დილაზე სად ვიყავით და რა საქმისთვინ გავისარჯენით. არადა, ისე ხმაშენყობითა მღეროდნენ, რო მეც მამანდომეს, კაცო-ო! ჩვენში რო ვთქვათ, დიდი მომღერალი არასდროს არა ვყოფილვარ, აბა, ტიტესთან ან ანიჩკასთან რას მივიდოდი, მაგრამ ბანის მიცემა კი შემეძლო. ხოდა, მივეცი კიდევ. გავიხედე – დიდცხვირა იმერელი, მეორე ხმას რო ამბობდა, მოტრიალდა ჩვენკენ. ცოტა ხან მიყურა ისე, რო სიმღერა არ გაუნყვეტია და მერე ხელით მანიშნა, მიდი, ხმას აუნიეო. მეც გავთამამდი და აუწინე ბანსა. ვანამ ჯერ გაოცებულმა გადმამხედა, მერე ჩუმად მითხრა გაჯავრებულმა: – „გაჩე, შე ვირო! მამიშენი ციხეში გდია, შენ კიდე პირი დაგილია და ღმუი აქაო!“ რას ვიზამდი, ხმა ჩავინყვიტე. იმერლებმა უჩემოდ ჩაამთავრეს მრავალჯამიერი. მერე ის დიდცხვირა კაცი ჩვენთან მოვიდა, გაგვეცნო და მკითხა, რათ გაჩერდი შუა სიმღერაშიო. რო მეთქვა, მამა პატიმარი მყაამ-მეთქი, არ გამოდიოდა. ერთი რო, იფიქრებდნენ, გიჟია ეს ვირიშვილი, რა ამღერებსო; მეორე კიდე ისა, რომ ხალხის მტრის სისხლთან და ხორცთან ქეიფს ვინ გაბედამდა იმ დროში, უხერხულობა რამე შაიქმნებოდა, სუფრა აირეოდა და იმ უცნობ კაცებს, ვინ იცის, სუმთლად ჩაშლოდათ ლხინი. ამიტომ, რალაცა აბდაუბდა მოვჩმახე. ის კაცი კი არ გვეშვებოდა: – „გადმოდით ჩვენ სტოლში, ბატონო, ვიმღეროთ, გავიცნოთ ერთმანეთითო“. „კახეთის მატარებელზედ გვიგვიანდებაო“, – მოკლედ მოუჭრა ვანამ. მაგრამ იმერელს რას მაიშორებ, კაცო, თან მთვრალ იმერელს! გადაგვიყვანეს, გვადღეგრძელეს, გზა დაგვილოცეს, თითო ნაჭერი გაცივებული კუპატიც მიგვაცოლებინეს და მშვენიერი „ოროველათი“ გამოგვაცილეს...

მე მგონი, სუ იმ კუპატმა ქნა, რაც მერე მოხდა. მატარებელში ორთავეს ნავთვლიმა, გეგონება, კამეჩის ბნელ ხახაში ჩავცვინდით. როგორცა შჩანს, დიდხან მეძინა. რო გავიღვიძე, უკვე გურჯაანს ვუახლოვდებოდით. გავხედე ვანასა და რასა ვხედამ, გარინდული ზის, სახე სუ ვაჭფითრებია, ცივი ოფლი ასხამს და მძიმედა სუნთქამს. რის ვაი-ვაგლახით ნამოვაცენე ფეხზე და

ვილაცა მთვრალი სალდათის დახმარებით ჩავეყვანე დაბლა. გურჯაანის ვაგზალზე კი ბნელა, ცივა და ლინეიკებიც არა სჩანს, გვიანია უკვე. უცბათ ცხენის ფლოქეების ხმა მემესმა. გავიხედე – ნისლიდან ცხენშებმული ფაეტონი გამოვიდა. ცხენი ჯაგლაგია, ფაეტონი კი – ძველი და მონჯლრეული, მაგრამ ამას ვინა ჩივის! ვანა იქვე, ქვის დაბალ ყორზე ჩამოვსვი, ჯიბიდან ჭინჭებში გახვეული ფული ამოვაცალე და ფაეტონისკენ გავიქეცი. კოფოზე ჩონჩხივით გამხმარი, პირშავი და წვრილულვაშიანი მეეტლე ზის. ფინთად მიყურებს, ფულის მიმცემს არა ვგავარ და იმიტომ. ვივაჭრეთ. როგორც იყო, სამ თუმანზე შევეუთანხმდი, ე პაპიჩემი ლამის ხელში აყვანილი მივიტანე ფაეტონთან, ჩავსვი და წავედით. გურჯაანს გაცილებულიც არ ვიყავით, რო გულისრევა დეენყო ვანას, დედის რძე არ შაარჩინა კამეჩაანთკარამდი. მე ხელით მიჭირამს, რო ემანდ არ გადამივარდეს ფაეტონიდან, ის ჩათლახი მეეტლე კი თავზე დამკივის: – „კარქა გადააყუდე, მანდაურობა არ მამითხვაროთ, ვირიშვილებო!“ როგორც იყო, ჩავალნიეთ ჩვენ სოფელში.

იმ ღამეს მალალი სიცხე რო მისცა, ორი კვირა არ განელეგია. მუცლის ტიფთაო, ტიროდა ანიჩკა. ისევ ვახვახიანთ დახმარებით ექიმი ჩამოუყვანეთ თელავიდან, წამლებიც ვიშოვნეთ და ამ ქვეყნისკენ მოვაბრუნეთ. ეგ არი, რომ იმ დღის მერე ხორცს აღარ გაჰკარებია ვანა პაპა, არც ხაშს, არც ბოზბაშს... ჩალაღაჯსა და მუყუყუზე ხო აღარაფერს ვამბობ. ყველი, მოხარშული კვერცხი და პური გახდა იმისი სარჩო, ხანდიხან ლობიოსა და წნილს თუ მაუნაცვლებდა, ეგ იყო და ეგა.

და კიდევ, ღვინოს მიეძალა, კაცო! დღე არ გავიდოდა, თავისი ორბოთლიანი შტოფი არ გამეცეცალა. არც ისე იყო დიდად მოლაპარაკე, ეხლა კი სუ გულჩათხრობილი და დარდიანი გახდა. თუ მაინცადამაინც რამე საქმე არ იყო გასაკეთებელი, წალდს აიღებდა, შტოფს ამაიილლიავებდა, პურის ნატეხს გაიყოლებდა და დილიდან ტყეში მიდიოდა, ვითომ წკნელების მოსატანად. დღის ბოლოს კიდე უფრო დაღვრემილი მოდიოდა ტყიდან, დაცლილი შტოფითა და თხილის წკნელებით ხელში. ამ წკნელებს გომურის სხვენში ალაგებდა, დღემდე არ ვიცი რათა. ეგრე იყო სიკვდილამდი...

სიკვდილიც რა უცნაური შეხვდა, ცხონებულს! კარქა მახსომს, ივნისი იდგა, თბილოდა. ვანა დილიდან ტყეში იყო გასული. ჭიშკართან ფოსტალიონ ვალოდას ყვირილი მემესმა: „ტიტიკოს წერილი მოგიტანეთ, აბა, მალარიჩი თქვენზეაო!“ მანამ ანიჩკა არაყსა და თხილს გამოუტანდა, მე ვანას მოსაძებნად გავიქეცი. დავრბივარ წიფლიანში, ვეძახი პაპიჩემს, ხელში კი კანვერტი მიჭირამს. მაშინ კარდონივით სქელი ქალაღდის კანვერტები იყო, კარიჩნი ფერისა. ზედ ქიმიური ფანქრით ეწერა მისამართი და ორი ბეჭედიც ერტყა ხოლმე: ერთი – რგვალი, მეორე კი – სამკუთხა. ახალი წლის მოსვლა არ გვიხაროდა ისე, როგორც ტიტეს წერილებისა. ხოდა, მინდა ვახარო

პაპიჩემსა, ის კი არსადა შჩანს, არც მეხმიანება. თელი ღარტაფები მოვიარე, ნაკადულები ვტოპე. მზე უკვე გადაინვერა, მეც დავიღალე, გავცაღლდი. ბოლოს ერთ უტყეო ალაგას მოვხვდი. ველობია პატარა, ზედ ერთი დიდი ნიფლის ხე იზრდება. ბალახი შარშანდელი ხმელი ფოთლებითაა დაფარული. აქ-იქ ჯიმლა-სოკოებს ამოუყვიათ თავი ნემომპალიდან. ხეზე წყვილი ყვავი ჩამამჯდარა და ავადა ყრანტალებს. ახლო მივე იმ ხესთან. ვხედამ, დაბლა ვანა ნემს გვერდულად. ჯერ მამეჩვენა, თითქო რალაცა თხელი საბანი აქვს წაფარებული. დავაკვირდი და თურმე საბანი კი არა, თელ ტანსა და ხელებზე პატარა ჟღალი ჭინჭველები დასევია ერთთავად. იმდენი არიან, რო კაცი თითქმის აღარცა სჩანს. ნიფლის ფესვებთან მიგდებული შტოფიც სუ ჭინჭველებს დაუფარამთ. თვალებზე ხელი ავიფარე, ფინთი სიზმარი მეგონა.

ესე წაიყვანა ჩემი და ანიჩკას პაპა მიქელგაბრიელმა, წყნარად და მოულოდნელად... ღარიბული ქელებიც ჩათავდა, მეზობლებიც წავიდ-წამოვიდნენ და დავრჩით ორნი თელ ქვეყანაზე. რამდენიმე დღეში კი ომიც დაიწყო და ვისლა ახსომდა ჩვენი ოხერი თავი, ყველას თავისი უბედურება ჰქონდა სადარდებელი. ისევ ელიჩკას ძმიშვილი, ელიზბარი თუ ჩამოგაკითხამდა ხოლმე თელავიდან, მანამ გაინვევდნენ. მგონი ანიჩკა უყვარდა, მაგრამ არკი ამბობდა. ხათრიანი ბიჭი იყო, კულტურული. ვარონეჟთან უგზოუკვლოდ დაიკარგა, საწყალი. მაგრამ ელიჩკა ამას აღარ მოსწრებია... კიდე კარგი.

ორმოცდაორი წლის ზამთარში ანიჩკაც გამაიძახეს კამისარიატში. ექიმებისა და ექთნების მობილიზაცია გამოცხადდა. მაშინ, გენაცვა, დიდი ბრძოლები იყო მარუხზე და ქლუხორზე, გერმანელები აფხაზეთს იყვნენ მომდგარნი. სოხუმის ჰოსპიტალი ველარ აუდიოდა დაჭრილებს. თელმა კამეჩანთკარმა გაიგო ანიჩკას განვევის ამბავი. აბა, შეიქნა ერთი რია-რია, ზოგს თბილი წინდები მოჰქონდა, ზოგს საგზალი; ხანდაზმულები ჭკუას არიგებდნენ, გოგოები ტიროდნენ და იწირპლებოდნენ. მე კი ვიჯექი პირგამეხებული, გულში ცეცხლი მიტრიალებდა და ვერკი ვამბობდი იმას, რაცა მდაგამდა. ანიჩკა აქეთ მამხნევებდა და მენაგლებოდა. როცა ბუმლატში გახვეული და თბილი კასინკით თავნაკრული გრუზავიკზე ადიოდა, მაშინლა აუცრემლდა თვალი, – „დარდი ნუ გაქ, მე არაფერი მამივა, საღსალამათი დაგიბრუნდებო, შენ მთავარია თავს მიხედო“, – მითხრა და აცოცდა კუზაოზე.

დაბრუნებით კი მართლა დაბრუნდა ორმოცდახუთში, მაგრამ სამ კვირაში მლადში ლეიტენანტი, ბოჩია პაჩკორიაც ჩამოჰყვა თავისი დოსტებით, ხორაგითა და საჩუქრებით. სოხუმის ჰოსპიტალში გეცნოთ ერთმანეთი. მერე ომმა ერთი უკრაინაში გადააგდო, მეორე კი – ბელარუსიაში, თუმცა წერილებს მაინცა სწერდნენ ერთმანეთსა. ეხლა ეს

მენდლებიან-ორდენებიანი ბოჩია ცოლობასა სთხოვდა ჩემ დას, ის კი ღელამდა, ნერვიულობდა, არც ჰოს ამბობდა, არც არას. სამ დღეს ვიქეიფეთ, დავახლოვდით, ანიჩკა კი ისევ ყოყმანობდა. ერთხელ ყური მოვკარი, ბოჩიას ეუბნება: – „მე ჩემ ცალხელა ძმას უპატრონოდ ვერ დავტოვებო“. აქ კი გაუვარდი თვრალი და ბოჩიას დავსჭყვივლე: „რა გაატრიზავთ ე ქორნილი, მოკიდე ხელი ამ ჩემ სულელ დასა და ნავედით შენთან სამეგრელოში-მეთქი!“ ეგრე გავათხოვე ანიჩკა. ხან მე ჩავდიოდი ნალენჯიხაში, ხან ისინი – კამეჩაანთკარში. მეერე გოგოები ეყოლათ: მარინა და ეთერი. მარინას მაინც სუ პატარაობიდან აქეთ მაუნემდა გული. უკვე ინსტიტუტში სწავლობდა და მაინც, არდადეგებს ისე არ ჩამთავრებდა, რო ერთი კვირით ჩემთან და თამარასთან არ ჩამოსულიყო. სერგო გოგოჭურიც აქ გაიცნო, შაუყვარდა და ასე დარჩა კამეჩაანთკარში ჩვენდა გასახარად. ეთერი კი ზაფხულობით უფრო მამიდასთან, კლარა პაჩკორიასთან იყო ხოლმე სოხუმში. „კახეთის ჰაერი არ უხდებაო“, – გულის გასაკეთებლად გვატყუებდა ანიჩკა.

ზოგი ჭირი მარგებელიაო, ხო გაგიგონიათ? მე, გენაცვა, ჩემმა ხეობრობამ გადამარჩინა ფრონტისაგან. ომამდე ერთი წლით ადრე, რაჭველ დურგლებს მიმაბარა ვანამ: „რაკი საქონელს გულს ვერ უდებ და არც მიწის მუშაკობა მოგდემს, სეზონზე შეგირდად გაჰყევი დომენტისა და ხარიტონს, იქნება ხელობა მაინც ისწავლო, თავი რითიმე რო გაიტანო“. იმ ხანად კერძო სახლის მაშენებელი ცოტა თუ ვინმე იყო კახეთში, უჭირდა ხალხსა. ჩვენც უფრო საკოლმეურნეო მშენებლობებში გვეძახდნენ დამხმარე მუშაკებად. ვანას დიდი ხათრი ჰქონდათ მაგ დურგლებს, თორე ჩემნაირ უხეირო შეგირდს არ გაიჩერებდნენ. თელი კახეთი მოვიარეთ, საჭმელ-სასმელს არ გვაკლებდნენ ჩვენი დამქირავებლები. ღამე სოფლის კლუბებში ან პირდაპირ მშენებლობებზე გვეძინა ნაბდებში გახვეულებს და ვიყავით ასე. ხარიტონს ერთი ჩიხოლიანი აკარდიონი ჰქონდა. ვახშობას რო მოვრჩებოდით, განელამდა და მღეროდა. მეც ავყვებოდი ხოლმე. დომენტის კი არ ვამღერებდით, ანგელოზები რო არ დაეფრთხო თავისი უამური და ფარშავანგით მკვიანა ხმითა.

ერთხელაც ვაქირში ვართ, ფერმას ვაშენებთ. ვაქირი ხო იცით, დიდი სოფელი როა ტრასაზე? კალატოზები მორჩნენ თავიანთ საქმეს, კედლები ამაიყვანეს. ეხლა ჯერი ჩვენზეა, კოჭები უნდა გამოვთალოთ და გადავხუროთ. დომენტი და ხარიტონი მორებსა ხერხამენ, ამუშავებენ, მე კი სოფლელებს ვეხმარები – კოჭები მალლა აგვაქ და თავ-თავის ალაგას ვანყოთ. ორ-ოლი კაცი კედლებზე ვდგავართ აქეთ-იქიდანა, თოკები ხელზე გვაქ დახვეული. ქვემორეები თავსა და ბოლოში ჩააბამენ კოჭსა, ჩვენ კიდე მალლა ვეზიდებით. მძიმეებია ე შობელძაღვლები. ერთიც ავითრიეთ, ავზიდეთ მალლა და ის არის ფოსოში უნდა ჩავაყენოთ, რო გაღმელების თოკმა ველარ გაუძლო და განყდა. გაქექილი იყო, როგორცა სჩანს. კოჭის



იქითა ბოლო დაბლა დაქანდა, გრუხუნით დეენარცხა მინაზე, ეს ბოლო კი მე მაქვს დაჭერილი და თოკი მაჯაზე შემოხვეული. აბა, რას გაუძლებდა ე ჩემი ხელი ამოდონა სიმძიმეს, საშინელი ძალით დამქაჩა თოკმა, დასწყვიტა ძარღვები და თელი მტევანი წამაცალა. ეგ მერე გავიგე, მაშინ კი ტკივილისაგან თვალთ დამიბნელდა, კედლიდან გადმოვვარდი და გონება დავკარგე. სისხლში მოთხვრილსა და გონწასულს თურმე დომენტი და ხარიტონი მამცვინდნენ. მე არაფერი მახსოვს. გონს თელავის საავადმყოფოში მოვე. ანიჩკა, ვანა და ელიჩკა ვახვანიშვილი მადგანან თავს. იქვეა ქუცნა შაქარაშვილი, კახეთში განთქმული ხირურგი. „ალავერდში სანთლები გაქვს დასანთები და ცხვარი დასაკლავი, ვეჟო, ღმერთს მადლობა უთხარი, რო კიდე ესე იოლად გადაგარჩინაო“, – იძახის ქუცნა. „აბა, გენაცვალე, ეხლა უნდა მაგრა დადგე, ეხლა გამოჩნდება შენი ვაჟკაცობა. ეგ არაფერი, უარესებსაც უძლებს ხალხიო“, – მანყნარებს ელიჩკა. მე კი, სულელი, ვერა ვხვდები რა უნდათ, რას მეუბნებიან, მარტო ყრუ ტკივილსა ვგრძნობ მარჯვენა ხელში. როდის-როდის დავიხედე და მტევნის მაგივრად მაჯაზე შემოხვეული სისხლიანი ბინტები რო დავინახე, ცრემლები გადმამცდა. მივხვდი – სიცოცხლის ბოლომდი სხვისი ხელის შამყურესა და ხეიბარს უნდა მეჩანჩალა.

ერთი კვირის მერე ქუცნას გამოტანებული მალამოები წამოვიღეთ და დავბრუნდით სოფელში. მაგრამ მე ოხერს არც სოფლის საქმე მამდემდა და მემარჯვებოდა. ისე, რო ვთქვათ, აღარც საქმე იყო იმდენი. ჩვენი კამეჩები კოლმეურნეობაში რო შარეკეს, გული აუცრუვდა ხალხსა. ისევ ვანა და ძველები პატრონობდნენ პირუტყვს, ენანებოდათ მაინცა. მაგათ მერე კი ვინლა იყო კამეჩის მომვლელი და ყველის ამომყვანი. ჩქარა-ჩქარა და უცეფ-უცეფ, გვემის შესასრულებლად გაკეთებული ყველი, აბა, რა უნდა იყოს?! მენანება, რო ვიხსენებ ჩვენ პადვალში ნასვენებ ყვითელ-ყვითელ თავებსა.

ეგე, შვილო, დახე ვიტრინასა, სადაური ყველები აღარ არის: შვეიცარიული გინდა, ხოლანდიური, გერმანული, მგონი ფრანგულიცაა. თან სადა, კაცო – ჩვენთან, სოფელში, კამეჩაანთკარში! ვინ იცის, ილიკო ჯანდიერსა და მამიჩემ ტიტეს მაშინ რო მეეხერხებინათ აქაური ყველის გატანა პარიჟში, ეხლა განთქმულები ვიქნებოდით. სადმე ხოლანდიის ან გერმანიის სოფლის მალაზიაში იდებოდა ლამაზად შეფუთული თავები, ზედ „კამეჩაანთკარი“ და „გრუზია“ ეწერებოდა და კიდე, ვინ იცის, იქნებ ვანა პაპას კარტიჩკაც დეეხატათ ეტიკეტკაზედ! ეხლა კი ვართ ეგრე სხვისი მოიმედე და ხელში მაცქერალი. ეგენი თავისას აკეთებენ, კოხტადა ფუთამენ და თელ მსოფლიოში აგზავნიან. მაგათი მატარებელი, დიდი ხანია, დაძრულია. ჩვენა კიდევა, ე ქართველები, მივჩანჩალებთ უკანა. ჩვენი არაფერი მიდის აქედან იქით – არც ყველი, არც პური და არც სიტყვა. ეგ არი ფინთი, თორე სუპერმარკეტ რა ჯობია. ვზივართ მე და ეს საცოდავი თამარა

მარინას გახსნილ სუპერმარკეტში, ცყიდით უცხოეთის სანოვარებსა და თან ბედს მადლობას ვეუბნებით, რო პურის ფულ მაინცა ვშოულობთ.

ღმერთი ამ მარინას გაახარებს, როგორი მარჯვე გამოდგა. ეგა, გენაცვა, ჩემი დის, ანიჩკას უფროსი გოგოა, როგორც გითხარით. რალა გოგო, ორმოცდაექვსშია დაბადებული, ლამის სამოცი წლის დედაკაცია უკვე. ორივე შვილი რუსეთში ყაამ. ერთი თვალის ექიმია, მეორე კი აპერატორია, მოსკოვის ტელევიზიაში მუშაობს. მარინას აქაური ქმარი ჰყამდა, სერგო გოგოჭური. კუპონები რო შამაილეს, იმ წელს დაიღუპა ავარიაში საცოდავი, ველისციხესთან კამაზს დეეჯახა თავისი „ნოლშესტითა“. ეგენი კამეჩაანთკარელი გოგოჭურები არიან, დაბლა უბანში დგანან. მარინას მახლი, ანდრო გოგოჭური, თელავშია. კარქი ბიჭია, ენაკვიმატი და პურმარილიანი. ერთ დროს თეატრში იყო მსახიობადა, ვანიჩკა ინტბელიძესთან ერთადაც კი უთამაშნია „ღალატში“. მაგრამ დრო რო აირია და ცხოვრება გაჭირდა, მეეშვა არტისტობასა და ეხლა ნავთი შემოაქვს ძმაკაცებთან ერთად. მარინასაც ეხმარება, რაც შეუძლიან.

ანიჩკას პატარა გოგო, ეთერი, ხაშურშია გათხოვილი მილიციის უფროსზე. გელაშვილია გვარად. სამი შვილი ჰყამთ – მარიამი, ქეთევანი და გელა. ისე, რო ვთქვათ, მე მაგითი ამბები კარქა არ ვიცი; არ ჩამოდიან, გენაცვა, აქეთა. არც ჩვენ გვიძახიან და, აბა, მე და თამარა ხო არ ჩავადგებით ხაშურში. ანიჩკას დასაფლავებაზე იყვნენ ჩამოსული ერთი დღითა, ეგ იყო და ეგა. ეთერს იმითი მათქ თავი, რო მაგის ქმარს ქვიშხეთში რალაცა საყდარი გაურემონტებია, თუ ხელახლა აუშენებია. ააშენოს, კაცო, მაგას რა უშამს, მილიციის უფროსია მაინცა. აი, ჩვენთან კი, კამეჩაანთკარში, ლელალუტას ძმიშვილმა, კარლომ ააშენა ეკლესია წმინდა გიორგის სახელზედ. ეგ კარლო ცნობილი ქურდია მოსკოვში. რუსებიცა და ჩეჩნებიც დიდ პატივსა სცემენ თურმე. უნდა გენახათ, სამი მანქანით, დაცვით, მომღერლებითა და მღვდლებით რო მადგა ლელალუტანთ სახლსა. სამ დღესა ქეიფობდა თელი სოფელი, ზოგ-ზოგებს ფულებიც აჩუქა კარლომა. მეც დამიძახეს, მაგრამ არ წაველ, ავად ვიყავი. მარინა კი საგანგებოდ გამაიძახეს სტუმრებისათვის ყავის მოსადუღებლად. მაგისი ყავა და მკითხაობა უკვე განთქმული იყო თელ სოფელში. ჩუმლაყიდან და მელაანიდანაც კი მოდიოდნენ მოცლილი დედაკაცები სამკითხაოდა!

მკითხაობაზე ბოდიში, ეს ბოლო ხანებია, მამა ზაზამ აუკრძალა, მაგრამ ყავა თქვენც ხო მეგეწონათ? ეგ მარინამ ასწავლა თამარას, მაგრამ თითონ რო ადუღებს, ის მაინც სუ სხვაა. საცაა უნდა მოვიდეს, დეელოდეთ და არ წააგებთ – ნამდვილი სოხუმური რეცეპტი იცის მამიდამისისაგან, კლარა პაჩკორიასაგან... ხოდა, გენაცვა, სწორედ მაგ ყავით დაიწყო ყველაფერი, ეს კაფეცა და სუპერმარკეტიცა.

აფხაზეთის ომი ახალი დამთავრებულია, დიდი გაჭირვებაა, არც შუქია კახეთში, არც – კორმა და ბენზინიცა ჭიირს. ლტოლვილებით გაიმსო აქაურობა. არ ვიცი, მაშინ ვინ მაიფიქრა და ითავა, მაგრამ თბილისელი არტისტების დიდი კონცერტი გაიმართა თელავში. ვინც კი ცნობილი მომღერალი და მოცეკვავე იყო, ყველანი ერთიანად ჩამოვიდნენ. აბა, უპატივცემულოდ ვინ გაუშვებდა სტუმრებსა? სუფრა გაიმართა, მა რა იქნებოდა!

მეორე დღეს, დილაადრიან გაღვიძებია კონცერტის რეჟისორს. ხალხს სძინამს ჯერა, არც მასპინძლები სჩანან. ყავის დაღვეა მონდომებია. ყავა ხო არტისტების პური და ღვინოა, თქვენც კარქა იცით! გამოსულა კარში, მანქანაზე დამჯდარა, უფიქრია, ქალაქში გავივლი და სადმე დავლემო. აბა, გენაცვა, თელავში დილაადრიან ამისთანა სისულელეს რო აიკვიატებ, რა გამოგივა? ხაშისა და ხინკლის მეტს იშოვნი რამესა? მეტადრე – იმ დროში. ინტურისტის ბარი აჭედელი დახვდა, იქ ლტოლვილებს სამრეცხაო გემართათ, აფსაიტში და ზუზუმბოზე სიცილით მოკვდნენ ბუფეტრიკები – რა ყავა, რი ყავა, მოდი ხაში დაარტყი და ასი გრამი დააყოლეო. ვირზე შაჯდა ე ჩვენი რეჟისორი: „ვერაფერს შავჭამ და დავლემ, მანამ ყავას არ მამიტანენო“. ბოლო-ბოლო დაბლა, აეროპორტისკენ რო კაფეა, იმას მიადგა. კაფე აწერია, რა უნდა იფიქრო კაცმა?! შევიდა და რასა ხედამს – აქაც ხალხი პახმელიაზე გამოდის, ნინ პივის ბაკლები უდგათ და გალიფული ხინკლები ლანგრითა. ანდრო გოგოჭურიც თურმე აქ არ არი?! მიიწვიეს სტუმარი სუფრასთან. ამ რეჟისორს კი თავ-პირი ჩამოსტირის, უარს ამბობს დასალევზე, ყავა და ყავაო, გაიძახის, ბოდიში მამითხოვია და შასცა ვირის დედასა. ხოდა, მაშინ უთქვამს ანდროსა: – „თუ მანქნითა ხაარ, აქვე კამეჩაანთკარში მიდი, ჩემი რძალი იკითხე, მარინა პაჩკორია, და ისეთ ყავას დაგალევინებს, რო გაოცდებიო“. წამოსულა ე რეჟისორი. არ იცის, უკან დაბრუნდეს თუ ანდროს რჩევას დაუჯეროს. ხედამს, ორი მოცეკვავე გოგო მოდის ქუჩაში. მაგათაც ყავა სდომებიათ, კაფე უკითხამთ და ვილაცას გამოუშვია აეროპორტისკენა. დაისვა ორთავენი მანქანაში და წამაიყვანა ჩვენკენა. მართლაც, ცოტა ხანში მაადგნენ მარინასა. ეგრე-ეგრეო. „ჩემ მაზლს სწორი უთქვამს, ასეთ ყავას ვერ დალემთ თელ კახეთშიო“, – გასცინებია მარინასა. ამ დროს ჯიბის ტელეფონზე დაურეკეს ერთ-ერთ გოგოსა – სადა ხართო? იმ გოგოს კი მარინასთვინ უკითხამს, ჩვენი ანსამბლის მოცეკვავეებმა გაიღვიძეს, უყავობითა კვდებიან და რა იქნება, ეგენიც ჩამოვიდნენ, ფულს გადაგიხდითო. „ფული რა საკადრისია, უთხარით მოვიდნენ, ხოლოთ ესა და ეს ყავა წამაიღონ, თორე, ვშიშობ, ამდენ ხალხს ჩემი ზაპასი არ გასწვდებო“, – უპასუხნია მარინას.

მე და თამარამ არაფერი ვიცით, ეზოში მატყლია გაშლილი და ვბერტყამთ. მეზობელმა ამაიარა ტაჩკითა და გვეუბნება: „აბა, დროზე ჩადით

სერგუჟანთა, თორე იმოდოლა სტუმარი დეეხვა მარინასა, რო ველარ აუდისო“. გამიკვირდა კი, ამ დილაადრიან სტუმარს რა უნდა-მეთქი, მაგრამ რას ვიზამდით, გადავცვინდით საჩქაროდ. გავიხედოთ, მარინას ჭიშკართან ორი მანქანა და ერთი რაფი დგაა, ეზო კი კოხტად მორთულ-მოკაზმული ხალხითაა სამსე. მაგიდები გარეთ გამაუდგამთ. გასცქერიან კავკასიონის მთებსა და თან ყავასა სმენ მორიგეობით, რაკი იმდენი სკამი და ფინჯანი არ არი, რო ყველას ერთბაშად ეყოს. სანყალი მარინა ჯარასავით ტრიალებს, ლამის არის ბოლი გაუვიდეს. რეჟისორი კმაყოფილი ჩაანს, რანაირი ყავა არ მოუხარშა მარინამ: ჩვეულებრივი თურქული, სქელი ქაფითა; პა სულტანსკი, ნყალგარეული რძითა; დარიჩინიანი, დიდი ჭიქითა. „ესეთი ხედი, ესეთი ჰაერი და ესეთი ყავა ერთად დედამინის ზურგზე არსად არ არისო“, – თავისებს ეუბნება. „ირგვლივ კი ნაირ-ნაირი ჩორჩებო, – იცინიან არტისტები, – სოჩაა, მა რაა, შენ აგაშენა ღმერთმა ჩვენი აქ მოყვანისთვისო!“ ანგლობენ, კუჭკუჭებენ, ყავასა წრუპამენ, წასვლას არავინა ფიქრობს. მგონი, არც წავიდოდნენ იმ დღესა, მაგათი უფროსი და თელავის გამგებელი თავისი ფეხით რო არ მოსულიყვნენ და არ დეჩქარებინათ: „ხალხო, გუბერნატორი გიცდით საუზმეზე, წინანდალში პურმარილია გაშლილი და რა დროს ყავის სმაა, ხო არ გაგიჟებულხართო?“ ჩქარობდნენ კი, მაგრამ თითო ჭიქა რო გაშინჯეს, თითონაც გაგიჟდნენ.

ხოდა, გენაცვალე, ის დღე იყო და ის დღე – თუკი თელავში ვინმე ჩამოვიდოდა სტუმარი, ყავის დასალევად ჩვენთან მოჰყამდათ, კამეჩანთკარში. მარინას ყავას თამარას ნაზუქები და ელიჩკა ვახვახიშვილის რეცეპტით გამამცხვარი „ჟოზეფინაც“ დეემატა. გამგებელმა წინდანინ მამარაგა მარინა, თან შიგადაშიგ ფულად დახმარებასაც გამოუწერდა ხოლმე. თავიდან ვითომ უარზე ვიყავით, მაგრამ ჩვენი ხარჯით, აბა, რას აუვიდოდით ამოდელა დელეგაციებსა. ნელ-ნელა ეზო მოვაკოხტავეთ, ყვავილები დავრგეთ და ახალი ფეხსადგილიც ჩავდგით თავისი კაფელითა და პირსაბანებითა. მეც, რაც შამეძლო, ვეხმარებოდი ამ ჩემი ცალი ხელითა. ე პლასმასის მაგიდები და სკამები ანდრო გოგოჭურმა ჩამაიტანა სადღაცადან, მსოფლიო ბანკის ხალხმა კი კოხტა ფინჯნები და ლამბაქები გამააგზავნეს საჩუქრად, თან ცოტა კი არა – ოცდაათი ცალი. კარქა ეენყო საქმე. ცოტათი გავიმართეთ ნელში.

კამეჩანთკარში უკვე ეკლესიის მშენებლობა თავდებოდა, როცა მარინამ ორი დღით ჩამოსული ლელალუტანთ კარლო მაინვია. ანდრო გოგოჭურიც საგანგებოდ ჩამოვიდა თელავიდან. ჩემთვის, სწორე გითხრა, არ დაუძახნიათ, არც თამარასთვისა. მთელი საღამო და მეორე დღე ბჭობდნენ რალაცასა. ცოტა ხანში კი ეკლესიის მშენებლებმა მარინას ეზოში გადმინაცვლეს და მუშაობა გაჩაღდა. მეტლახი და კრასკები პირდაპირ თურქეთიდან მოდიოდა, ტრუბები და სანტეხნიკა – რუსეთიდან, კარ-

ფანჯრები და ვიტრინები – გერმანიიდან. ყველაფერი ესა, ცხადია, კარლოს მარიფათი იყო. თავიდან არ მამწონდა ეს ამბავი. ვუთხარი კიდეც მარინას: „ე ამ ღელაღუტაანთ ნაშიერს რო გედევკიდე, ხეირს არაფერს მოგიტანს-მეთქი“, მაგრამ, აბა, მე როდის რა მითქვამს ჭკვიანური!.. საშემოდგომოდ ე პატარა კაფე და სუპერმარკეტი წამაიჭიმა. გიორგობა დღეს მამა ზაზას ვაკურთხებინეთ. თელავში, გენაცვა, ეხლაც ვერა ნახამ ესრე მოკობტავებულ კაფე-მაღაზიასა; სხვა სოფლებსა და დაბებზე ხო აღარას ვამბობ.

თითქო ყველაფერი ეენყო, დალაგდა და დამშვიდდა. მაგრამ, აბა, წუთისოფელი მასვენებს კაცსა? კურთხევაზე ანიჩკა რო არ ჩამოვიდა, მაშინვე უნდა მეაზრნა, რო რალაცა ფინთი ამბავი იყო. არ უნდა დეგვეტოვებინა სამეგრელოში ეგრე უპატრონოდ. ბოჩიას დაღუპვის მერე სუ ამას ვიძახდი: „იქ რალა უნდა? ჩამავიყვანოთ, ჩვენთან ვაცხოვროთ-მეთქი“, – მაგრამ ვინ გამიგონა. „დედაჩემი სახლს არ დასტოვებსო“, – ამბობდა მარინა. არ დასტოვა და, ეგე – სასაფლაოც არ ეღირსა ადამიანური, ძალღივითა მარხია უდაბურ ალაგას. არა, ისე რო ვთქვათ, ადგილი კი ლამაზი შეეურჩიე: სამხრიჯვრის გზას რო დაადგები, ხელმარცხნით პატრა ბორცვია და ზედ ორი ძელქვა დგა; ქვეითკენ თათრული ხმალივით მოხრილი და მზეზე მოლაპლაპე ალაზანის ტოტი ჩანს, ზეით კიდე – ტყიანი მთა და თეთრი მწვერვალები. თუმცა, ამით რა ანიჩკასა?

ე-ეჰ! კარქი, აღარ დავლემ პივას, თორე უკვე გამოვშტერდი, კაცო! თამარა-ა! თამარ! წაილე, გენაცვა, ე ცარიელი ბოთლები! ისა, რა ქვიან – ტრიაპკაც წამაილე, გადასწმინდე, თორე ქაფი დემელვარა... ხო, კარქი, ნულა მიშლი ძარღვებს! აღარა ვსვამ-მეთქი, ველარ გაიგე-ე? ესენიც წასასვლელნი არიან... შენა, შვილო, თაკო გქვია, არა-ა?... შენა?... როგორა? ტუკა? ტუკა რა სახელია, ადამიანო? ახ, გია? ხო, გია სხვა საქმეა. თაკო და გია, ესე იგი... რამოდენა ვილაპარაკე, კაცო!

რა მკითხე, ვერ მესმის. ყურთაც დამაკლდა ბოლო ხანებია. სასაფლაოზე რათ არ დავასაფლავეთ? არ მინდა ამაზე ლაპარაკი. ან თქვენ რაში გეინტერესებათ უბედური ანიჩკას ამბავი? მართალია, უცნაურია სასაფლაოს გარეთ ადამიანის დასაფლავება, მაგრამ სხვა გზა არ იყო. არა, არ მინდა... როცა ამაზე ვფიქრობ, სულ გულ-მუცელი მემღვრევა. მაინც უნდა ჩასწეროთ? კარქი, თქვენთვინ იცოდეთ, მაგრამ რადიოში კი ნუ გამააცხადებთ, მრცხვენია... როგორ თუ რათა?! აბა, რა გამოსაცხადებელია, ადამიანი იელოველი რო გახდა?! იელოველი გახდა ანიჩკა, აბა!

პირდაპირ გეტყვი, დიდად მორწმუნენი ჩვენ არასდროს არა ვყოფილვართ. ვანა ზოგჯერ პირჯვარს გადაინერდა ხოლმე, აღდგომაზე კი საკლავსა ჰკლამდა და კვერცხებ ენდროთი აღებვინებდა ქალებს, ეგ იყო და

ეგა. იქნება სწორია მამა ზაზა და მართლაც ამის ბრალია ყველაფერი, რაც დეგვემართა. მაგრამ, ეს ოხერი – დროც იგრეთი იყო, რო იშვიათად თუ ვინმე დადიოდა საყდარში. ეკლესიებიც ძირითადად კარაჭედილი და ლამურების ანაზრად მიგდებული იყო. ალავერდობას თუ მაიკითხამდა ხალხი ღვედელსა და სანთელს. მარტო ორმოცდარში დაუშვეს წირვა-ლოცვა სტალინის ბრძანებითა. ისიც ალბათ უფრო იმიტო, რო გერმანელი უკვე მოსკოვთან იდგა და ხალხი ძრიალ შაშინებული იყო. სალდათები რო აღარა ჰყოფნიდათ, ლაგერებიდან დაიწყეს პატიმრების გაშვება ფრონტზე. მამიჩემის ბოლო წერილიც მაშინ მივიღეთ. „მანამ ეშელონებში დაგვსხამდნენ, ლაგერის უფროსმა გვითხრა, თუ ვინმე მორწმუნეა, შეუძლია ეკლესიაში ეზიაროსო“, – გვწერდა ტიტე. გაოცებული ამდენი ჭირის მნახველი ხალხი. თელ ამოდელა ლაგერში ხუთადხუთმა კაცმა გაბედა ზიარება. იქვე, სოფელ პატმაში, პატარა ხის ეკლესიაში მიუყვანიათ გალემილ მღვდელთან, რომელიც თურმე სკლადშია ც მუშაობდა გამგის მოადგილედ. აბა, რა მადლი უნდა ჰქონოდა იმის ზიარებას?! მაიმუნობაა, მეტი არაფერი! მაშინ ხო ნამდვილი ღვედლები ან გაკრეჭილები ან დახოცილ-გაციმბირებულები იყვნენ. ტიტე, მე მგონი, უფრო კომუნისტების ჯიბრით წავიდა ეკლესიაში, ვიდრემდინ რწმენითა. თუმცა ვინ იცის, გაჭირვებასა და უიმედობას ღმერთამდინ მიჰყამს ხოლმე კაცი... მაინც, ავად იყო თუ კარგად, მამიჩემმა ზიარება მიიღო და ისრე წავიდა ფრონტზე. ერთი წლის მერე იზვემჩენია მამიტანა ვალოდა ფოსტალიონმა. „პრაპალ ბეზ ვესტი პოდ სტალინგრადამაო“, – ეგრე გვატყობინებდნენ. ანიჩკა სოხუმის გოსპიტალში იყო და გადაწყვიტე, არ მიმწერნა ტიტეს ამბავი, რო ჩამოვა მერელა ვეტყვი, ეხლა ტყუილა რათ ავუშალო ძარღვები-მეთქი. რა მექნა, როგორ გამამეტირებინა მარტოს უიღბლო მამიჩემი? ჩემი ხნის კაციც აღარ იყო კამეჩაანთკარში, ყველანი ფრონტზედ წაასხეს. ავამსე ვანა პაპას შტოფი, დავჯე და მარტოკინამ დავლიე. ეგ იყო ეგა...

მამიჩემის პანაშვიდი სუ ეხლახან, ერთი სამი წლის წინ გადაიხადა მამა ზაზამ ჩვენ ეკლესიაში. მე ეგ არც მამაფიქრდებოდა, მაგრამ მარინამ აჩემმა, ჩემმა დიშვილმა. მაშინ ანიჩკა უკვე ჩამოყვანილი გვყამდა კამეჩაანთკარში. კიდე ვიძახი, ბოჩიას დაღუპვის მერე არ უნდა დაგვეტოვებინა მარტო, დროზე უნდა წამოგვეყვანა აქეთ. ის ოხერი სახლიც უნდა გეგვეყვიდა წალენჯიხაში, ფული კი მარინასა და ეთერს გეყყოთ შუაზე. არ გამიგონეს და, აბა, რა გამოვიდა? არც ანიჩკას უნდოდა სახლის გაყიდვა და არც ბოჩიას დას, კლარა პაჩკორიას. ეგ კლარა და მაგისი ქმარი, რამაზა ზგურდი, ჭკვიანები არიან. როგორც კი აფხაზეთში პირველი თოფი გავარდა, აიბარგნენ, აიკიდეს, რისი წაღებაც შაიძლებოდა და მოსკოვში გადავიდნენ. მერე იქ რამაზამ ბერძნების სათვისტომოს მიაკითხა, ჩაანყო კიდეცა და ეხლა ე ბებრები, თავიანთ გაუთხოვარ გოგოსთან ერთად, სალონიკებში

ცხოვრობენ, პასობიასაც იღებენ მთავრობისაგან, მათ კაცო! მარიფათიანი ხალხია ე ბერძნები!

საწყალი ბოჩია კი მოჰკლეს... ვინა? აბა, რას გაიგებ, გენაცვა?! აფხაზეთში მეორე წელია ომი მიდიოდა. თელ სამეგრელოში ძარცვა და ყაჩაღობა იყო, როგორც დანარჩენ საქართველოში, მაგრამ იქ მაინც – მომეტებულად. სახლებში უცვინდებოდნენ ხალხსა. აღარც სახსარი იყო, აღარც სანოვაგე. კიდე შვილები ეხმარებოდნენ ბებერ ცოლ-ქმარს – ხან ფეკილს გაუგზავნიდნენ, ხან – შაქარს, ხანაც – ორ კაპიკს, თუკი რასმე იმოვნიდნენ შემთხვევითა. ბოჩიამ და მაგისმა ორმა მეზობელმა, ყარამან ნონორიამ და ანზორა კაყემიაკინმა, ერთი რალაცა პატარა, დანჯღრეული ტრაქტორი გადაინარჩუნეს კომუნისტების დროიდან. მალვით ინახამდნენ, რო ვინმეს არ წეერთმია. თითონ გამართეს, გაარემონტეს და შელებეს ახლიდანა. ოქროს ხელი ჰქონდა ბოჩიას. მაგისი გაუკეთებელი არაფერი იყო წყლის მატორებიდან დანყებული, საათით გათავებული. მაგ ტრაქტორის მეოხებით ტყიდან დიდრონი მორები გამოჰქონდათ ბერიკაცებს, სჭრიდნენ და ეგრე თბებოდა ნახევარი უბანი.

იმ დღესაც მილიციის ბეტეერშიკისათვის ჭაჭა გეეცვალათ ხუთ ლიტრა სალიარკაში, რო ტყეში წასულიყვნენ შეშის ჩამოსატანად. ორნახად ჭაჭაზე უარს ვინ ეტყოდათ?! ე ბეტეერი მაინც უქმად ეგდო მილიციის ეზოში. თითონ მილიციები კი შიშით ცხვირსაც ვერა ჰყოფდნენ გარეთ, დღედაღამ შენობაში ისხდნენ და ლოთობდნენ. მარტო იმასა ფიქრობდნენ, როგორ დეეცვათ თავი, თუკი ყაჩაღები დეეცემოდნენ.

მოკლედ, ბოჩია და მაგისი მეზობლები წასულან ტყეში, დიდი თელა მაუჭრიათ, ჩაუბამთ ტროსითა და ის იყო, უკან უნდა გამობრუნებულიყვნენ, რო ტრაქტორი ველარ დაუქოქამთ. როგორც მერე სთქვეს, სალიარკა გამოდგა უვარგისი და რალაცა შლანგი თუ წასოსი გასჭედა. მინამ დაშალეს და გასწმინდეს, რაც გასაწმინდი იყო, შაბინდა კიდეც. ამ დროს კი რა ხდება – გაგანია ომია აფხაზეთში, კაცო! ფინთათ არი საქმე, გამსახურდიას ხალხსა კიდე გზები შაუკრამთ, არავის ატარებენ სამეგრელოზე, რო ჩავიდნენ და ჩვენებს დეხმარონ. ჩემზე კარქა იცით, როგორც იყო ეგ ამბავი... წინა დღეებში კიდე ვილაცა დიდი კაცი ჩასულა თბილისიდან წალენჯიხაში იქაურებთან სალაპარაკოდ, იმათ კი აულიათ და გაუტაცნიათ. ეხლა აქედან მხედრონი მაადგა წალენჯიხას. ესენი აქეთა დგანან, ისინი – იქით, შუაში კი ახოებია. ტყიდან გამამავალი საურმე გზაც ზედ ამ ახოებზე არ გადი-ის?! მხედრონები ჯერ უცდიან, იქნება გონზე მოვიდნენ ე მამაცხონებულები, ი კაცი მაინც გამოუშვან, რო ყველაფერი უსისხლოდ დამთავრდეს. ამ ყოფაში არიან და არავინ იცის როდის გავარდება. მაგრამ ეგ ამბები, აბა, რა იციან შეშაზე წასულებმა?! რალა ბევრი გავაგრძელო და, ტყიდან მოულოდნელად ამოთრახთრახებულ მორებჩაბმულ ტრაქტორს ორთავე მხრიდან დაუნყეს

სროლა პულიმიოტებიდან და ავტომატებიდან. როგორც სჩანს, იფიქრეს, გზასა ხერგამენო. ანზორა და ბოჩია ადგილზე მოკვდნენ, ყარამან ნონორიას კი სამი ოპერაცია გაუკეთეს, ერთი მარტივლში, ორი კი – ქუთაისში. თითქო გადაარჩინეს, ფეხზედაც წამაყენეს, მაგრამ ბოლოს მაინც გადაჰყვა ბერიკაცი ამოდონა ჭრილობებსა და ნარკოზებს.

ბოჩიას ორმოცმა ნელა და ტაატით გაიარა, გაუსაძლისად. ანიჩკა სუმთლად მაიკუნტა, გახმა, ერთბაშად დაჰკარგა ცხოვრების ხალისი. ადრეც თავისნათქვამა იყო, ეხლა ხო სუმთლად ვირზე შაჯდა: „რა გინდათ? ყველას თქვენ-თქვენი ცხოვრება გა-აქვთ, მე თავი დამანებეთ, ჩემი ქმრის სახლში მინდა დარჩენაო“. დარჩა ეგრე მარტო ჩემი და. ღორსა და ქათმებს უვლიდა, ქსომდა და კიდე, სალამობით მიუჯდებოდა ხოლმე როიალსა და ჯერ კიდე თელავში, ელიჩკა ვახვახიშვილის სახლში ნასწავლ რამე-რუმეებს უკრამდა. სიმღერით კი აღარ უმღერია. ბოჩიას დალუპვის მერე მაგისი წკრიალა ხმა აღარავის გაუგონია. სიმღერა კი არა და, ლაპარაკითაც თითქმის არა ლაპარაკობდა.

ამასობაში, სოხუმი დეეცა. უსახსროდ და ბოგანოდ დარჩენილი ხალხი მაანყდა სამეგრელოს. შაიფარეს მეგრელებმა, რაც კი შეეძლოთ. ანიჩკასთან რამაზა ზგურიდის დეიდაშვილები მისულან ღამის გასათევად... ლობჟანიძეები, ალინა და თინა. ალინა სუბტროპიკული ინსტიტუტის ბულალტერი იყო თავის დროზე, თინა კი სკოლაში ინგლისურს ასწავლიდა. სოხუმიდან ძლივს გამეესწროთ. საშინელ ამბებსა ჰყვებოდნენ. თავიანთი თვალით ენახათ, ცოცხლად როგორა მარხამდნენ ჩვენ უიარალო ჯარისკაცებს. კიდე კარგი, სამოცდაათს მიტანებულ შინაბერა დებს მარტო გაძარცვა აკმარეს, ჯიში და ჯილაგი შააგინეს და ეგრე გადმოუშვეს ენგურის ხიდზედ. საცოდავებს ბაშმაკები დახეოდათ ამხელა გზაზე, გაყინული ფეხებიდან სისხლი სდიოდათ. ერთი ღამით მოსულეები, თავისთან საცხოვრებლად დაიტოვა ანიჩკამ, მა რას იზამდა?! ჩვენც გვიხაროდა, რო სუ ეგრე თავგვივით მარტო აღარ იქნებოდა ამ ხნის დედაბერი.

ცოტა ხანში ეგ ალინა და თინა მიდგნენ, მოდგნენ, ლტოლვილის კნიჟები გაიკეთეს და სანოვავის მოტანა დაიწყეს: ეს მაკარონი და ზეთიო, ეს შაქარი და ფქვილიო. თან ცოტა კი არა, ბლომ-ბლომათა, კაცო! თავიდან თითონ მოჰქონდათ ზუგდიდიდან, მერე კი მოტანითაც აღარ იწუხებდნენ თავსა – ვილაკეები უზიდამდნენ მანქნითა. ანიჩკას სახლში უცხო ხალხმა დაიწყო სიარული. „უწყინარი იერისანი იყვნენო“, – მე ასე მითხრა. ხოდა ნელ-ნელა გაუშინაურდნენ კიდეცა. სმით ეგენი არა სვამენ, ამიტომაც ხან ჩაიზე მოვიდოდნენ, ხან დილის საუზმეზე. თან რაღაცა წიგნები მოჰქონდათ ფერად-ფერადი, გაზეთები და სხვა ასეთები. რაღაცეებს უკითხამდნენ, ელაპარაკებოდნენ ანიჩკასა. ჩვენაო, მამა ღმერთის – იელოვას მოწმეები ვართო. როცა სხვადასხვა ხალხების ღმერთებს ასამართლებდნენ, იქ



მონმედ დავუდექით ჩვენ ღმერთსაო. მაა, კაცო!.. რა-ა შვილო? რავი, ერთი, წესიერად არც მახსოვს. მგონი ეგ მსოფლიო სასამართლო ბიბლიაშია აღწერილი. მაშინ იელოვა წინ გამოსულა და უთქვამს: „ხალხო, თქვენა ხაართ ჩემი მონმეები... მე ავირჩიეთ მონმეებად, რო მცნობდეთ და გჯეროდეთ ჩემიო!“ ეგ ანიჩკამ მითხრა სიკვდილამდე ერთი-ორი დღით ადრე. იმხანად ბევრი გაიელოველდა სამეგრელოში, ზოგი სიბრიყვით, უფრო მეტი კი – გაჭირვებითა. რას იზამ, შვილო, სული ტკბილია და როცა სხვა სახსარი და მამხედავი არა ჩანს, იელოვასაც დაუდგები მონმედ. ზოგიერთები, გენაცვა, იელოვას კი არა, პროკურატურასა და გამომძიებლებს უდგებიან ცრუ მონმეებად და ვითომ არაფერი. ეგეთი ამბავი იყო სამეგრელოში და სხვაგანაც... თელ საქართველოში.

მერე ხმა გამოვარდა, იქაურმა მიტროპოლიტმა იელოვები შააჩვენაო. ამას კიდე ისიც დემატა, რო საქონელს ჯილენი დეერია. განყდა ხარ-ძროხა, სარჩო-საბადებელი მეესპო ისედაც გაღატაკებულ ოჯახებს. „იელოვების ბრალი იქნებაო, – იძახდნენ ვილაც ვილაცებში, – ჯერ ხალხს შიმშილით ნელში გასწყვეტენ, რო მერე თავიანთი ნაჩუქარი ფქვილ-ზეთებით თავის რჯულზე ადვილად მიაქციონო“. მარტვილში ვილაცა ილარიონ ფიჩორი გამოჩნდა, თავის დროზე ეკლესიიდან ქურდობისათვის გაგდებული, ორჯერ საგაიეში ნაჯდომი. ხალხი შამაიკრიბა – სამეგრელო იელოვებისაგან უნდა გავნმინდოო, გამააცხადა. მალე იმდენნი შაიქნენ, რო მაგითი შიშით ვერც მიტროპოლიტი და ვერც მილიცია ვერაფერს ამბობდა. მერე, თურმე ფოთში მიუვარდნენ იელოვას მონმეებს, სკლადები გაუტეხეს, წიგნები დაუნვეს, ხალხისთვის დასარიგებელი ფქვილის მემოკები დაფატრეს და პალიასტომში ჩაჰყარეს, შაქარს კი წყალი მიუშვეს შლანგებითა. მაა, კაცო! ხალხს აშინებდნენ, სახლებში უცვივებოდნენ, ანიოკებდნენ. ჩემი დისთვისაც შემეეთვალა იმ ფიჩორს: „ჭკუაზე მოდი და ჩამოშორდი იელოვებს, თორე შენც მოგწვდებითო“. აბა, მაგის თქმა იქნებოდა ანიჩკასათვის? უფრო გაკერპდა. უთქვამს: „ილარიონ ფიჩორი ვინ ოხერია, რო მე, ბოჩია პაჭკორიას ქვრივს, ჭკუას მასწავლის და მემუქრებაო?!“ მეზობლებმა აღმაცერად დაუნყეს ყურება ანიჩკას. გაიყო და აირია ხალხი. ზოგნი აღინასა და თინას გაგდებას ურჩევდნენ, ზოგნი ჩუმ-ჩუმად მაგითებურ შეკრებებზე დადიოდნენ, ზოგიც გაიყურსა და დეელოდა, რა მოხდებოდა.

რო იცოდეთ, ბოჩიას სახლს კარგა დიდი, ჩრდილიანი ეზო აკრამს. შუაში ძველი კაკლი ხე უდგათ, მოშორებით – ბლები და ხურმა. ირგვლივ ბალახი ბიბინებს. ნეხვსა და ლაფს ვერსადა ნახამ, ჩვენგან განსხვავებითა. ხოდა, იქ უთხოვიათ იელოვებს თავიანთი ყრილობისა თუ რაღაცა ოხრობის გამართვა. ვერ უთხრა უარი ანიჩკამ. სხვა დროს იქნება უარიც ეთქვა, მაგრამ მე ხო კარქა ვიცნობ ჩემ დასა! უთუოდ იმ ოხრის, ილარიონ ფიჩორის ჯიბრით დასთანხმდა. ხალხს იმას როგორ ათქმევინებდა, მუქარის შაეშინდაო! ხოდა,

წინდლით გრუზავიკები მაადგა ანიჩკას ქიშკარს. გრძელი მერხები გადმაიდეს, დაალაგეს, ტენტი გადასჭიმეს, თავიანთი ფერად-ფერადი ნიგნები, ჟურნალები და ფანქრები მოზიდეს, ე ამნაირი ჩიფსები და კოკაკოლები დაანყვეს იაშიკებითა. ეგრე იყო ეგ ამბავი, კვირა დილით კი თუ ვინმე იელოველი ჭაჭანებდა სამეგრელოში, სუყველა პაჩკორიების ფუძეს მაანყდა. მოდიოდნენ მანქნებითა და მარშრუტკებითა, ავტობუსებითა და მატაციკლებითა, ტაჩკითა და ფეხითა. ვილაცა ინგლისელი ქალი და ორი ფინელი კაცი ჩამოჰყვათ თავიანთი თარჯიმნებიანათ.

გაიმსო თელი ეზო იელოვლებით, ტევა აღარ არის. დები ლობჟანიძეები ეზოს შესასვლელში დგანან და უცნობ-ნაცნობს ესალმებიან. მოსულები კი დინჯად ირჯებიან, ნელა შემოდიან ქიშკარში და წყნარადა სხდებიან მერხებზედ. სუყველანი, ქალიან-კაციანად ერთი დედის გაჩენილებივით ჩლუნგად ილიმებიან და თვალებს დაბლა ხრიან, თითქო იმის თქმა უნდათ – ხო ხედამთ, რა მორჩილი და სათნო ხალხი ვაართო. ჯერ კიდე ახალი დანყებული იყო მაგითებური ლოცვაა თუ რაღაც ოხერი, რო მეზობლის გოგო შემოვარდნილა ეზოში, ანიჩკასთან მიურბენია და უთქვამს: – „წალენჯიხაში ილარიონ ფიჩორი გამოჩნდა დიდძალი ხალხითა და ეხლა შენკენ მოდიანო“. რა უნდა ექნა ანიჩკასა? ამოდოლა სტუმრებს ხო ვერ გაყრიდა? ცოტა ხანში მართლაც ზარების ხმა და რაღაცა გუგუნი მეესმათ. მერე ყოველის მხრიდან ეზოსკენ მომავალი უშველებელი ბრბო დაინახეს. ზოგს კეტები და არმატურები უჭირამს ხელში, ზოგს კი – ადლიანი ჯვრები. წინ გიჟი ფიჩორი მოუძღვით და კიდე სამი ახმახი მნათე, ზარებით ხელში. მოდიან, მაალაჯებენ, თან ზარებს არისხებენ, თითქო მოსიარულე სამრეკლოები ყოფილიყვენენ. იმ ინგლისელ ქალს აღბათ, შიშისაგან, ხმა ჩაუნყდა. ვერც აღინა და თინა იქნებოდნენ ყოჩალად. ისეე ანიჩკამ იმარჯვა – გარეთ გავიდა და ქიშკრის წინ დადგა გულზე ხელებდაკრეფილი. კუშტად მომზირალი შავოსანი დედაბრის დანახვაზე ბრბო შეჩერდა ძალაუნებურადა. ერთხანს ი ფიჩორიც კი შემცბარა. ანიჩკას უთქვამს: „ვინა ხართ და რა გინდათ? თუ სასიკეთოდ მოსულხართ, თქვენც ამეებივით სტუმრად მიგიღებთ, თუ არა და ნუ ამინებთ ხალხს, წყნარად უთხარით თქვენი სათქმელი და გაბრუნდითო“. ამის გაგონებაზე ისეე აიჯაგრა, აყვირდა ბრბო. ანიჩკამ ხელი აიქნია და ხმას აუნია: – „მე ბოჩია პაჩკორიას ქვრივი ვარ, თელი სამეგრელო ჩემ ოჯახს პატივსა სცემს და მოდი, ცუდ საქმეს ნუ იზამთ, უბედურებას ნუ დაატრიალებთ, თორე არც ღმერთი და არც ხალხი ამას არ გაპატიებთო!“ იქ კი გონს მეეგო ფიჩორი, საზარელის ხმით დასჭყივლა: – „რას უსმენთ მაგ სატანის მოციქულს, დასცხეთ ზარებსაო!“ მნათეებმაც შემოჰკრეს ზარებს, რაც ძალა და ღონე ჰქონდათ. ორმა კაცმა ანიჩკა გვერდზე მოისროლა და გამხეცებული ბრბო ყიჟინითა და ღრიალით შეიჭრა ეზოში. განურჩევლად სცემდნენ დიდსა და პატარას, ამტვრევდნენ ყველაფერს, რაც გზადა ხვდებოდათ. უცხოელებს

გადაფარებულ ალინას მნათემ იდაყვი სთხლიშა ცხვირ-პირში და კაკლის ხეს მიანარცხა, დაბლა დაცემულ თინას კი გაავებული ქალები თმებით დაათრევდნენ. ამ დავიდარაბაში ტენტი ჩამონვა და ზედ დეეფინა ერთად შეჯგუფულ იელოვლებსა. ტენტქვეშ მოყოლილ შაშინებულ ხალხს სუყველა მხრიდან მიესივნენ და გამეტებით ურტყამდნენ კეტებსა და არმატურებს. დასისხლიანებულთა კივილი და კენესა ცასა სწვდებოდა. ამასობაში მნათებმა შუა ეზოში კოცონი გააჩაღეს და ზედა სწვამდნენ წინდლით მოტანილ მერხებსა და დაფებს, იელოვურ ნიგნებსა და ჟურნალებს. მერე ანიჩკას აივანზეც ავარდნენ, შაგლიჯეს კარებები და ოთახებში შაცვივდნენ. ოთხი კაცი ნიგნის კარადას დეეჯაჯგურა, საცა ბოჩიას ნაგროვები ნიგნები ინახებოდა. ჭიანჭველებივით წეესივნენ, გამათრიეს ეს შკაფი ბალკომში, ასნიეს და ზათქით გადაუძახეს ეზოში. შუაზე გამსკდარი კარადიდან გადმოცვენილ ნიგნებს პირდაპირ კოცონში უძახებდნენ. ვინლა იყო იელოვურისა და ქრისტიანულის გამრჩევი. როდის-როდის მილიციაც მოვიდა, უფრო უცხოელების გამოსაყვანად. ე უცხოელები რო არა, ვინ იცის, სულაც არ მოსულიყვნენ.

ჩვენა, გენაცვა, ეგ ამბები მერე გავიგეთ – ეთერმა შაატყობინა მარინასა. წალენჯიხის მილიციის უფროსს, ბორია ცეკვავას, რაციით დეერეკნა ეთერის ქმრისთვის: – „კაკო, მანამ ბოჩიას სახლ-კარი სულ გადაუბუგამთ, შენი იელოველი სიდედრი დროებით გაარიდე აქაურობას. ხალხი ძალიან გამხეცებულია. მე, ძმაო, ჩემი ძალებით მაგას ვერ დავიცამ და უბედურება რამე არ დატრიალდესო“.

კაკო გელაშვილს თავისი ცოლი და მოადგილე მილიციის მანქანით გაუშვია წალენჯიხაში ანიჩკას ჩამოსაყვანად. იმათაც ჯერ ცეკვავასთან გაუვლიათ, განყოფილებაში.

ბორიასგან გაიგეს, რო დარბევის დღეს მეზობლის ბიჭებს გადაურჩენიათ ანიჩკა, ჩუმად გაურიდებიათ გაავებული ბრბოსთვის და ფერმაში გადაუმაღავთ. უცხოელები ჰაერში სროლითა და დავიდარაბით გამოუყვანია მილიციას. იმათ კი ალინასა და თინას წამოყვანაც მოუთხოვიათ ბორიასთვისა. „ჩვენ აქ ვერ დავტოვებთ ჩვენს დებს! ეხლავე გამოიყვანეთ და გაგვატანეთ, თორე თელი უცხოეთის გაზეთებსა და ტელევიზორებს მოვდებთ ქართველების მხეცობისა და მილიციის უფარგისობის ამბავსაო!“ რას იზამდა ბორია ცეკვავა, რის ვაი-ვაგლახით ჩაუსვამს მანქანაში თავპირდასიებული და ტანსაცმელშემოგლეჯილი ლობჯანიძის ქალები. მერე იმ უცხოელებმა თბილისში თინას ინგლისური განცხადება დაანერინეს, საქართველოდან წასვლა მათხოვინეს და ეხლა ეგენი, გენაცვა, მგონი ფინეთში არიან, იელოვლების მთავარ ბუდეში, მა-აკაცო!

ბორიასთან ლაპარაკის მერე ხაშურლები ბოჩიას გაპარტახებულ კარ-მიდამოში მისულან. სახლს აღარც ღობე შარჩენოდა და აღარც ბალკომის მოაჯირები. ეთერმა ვერაფრით ვერ დაითანხმა დედამისი ხაშურში წასვლაზე. არ მისდევდა ჩემი და, ჯიუტობდა. ეგ ჯიუტობაც გვარში გვააქ, კაცო, ცხონებული ვანა პაპიდან მოგვდემს. ბოლოს, როგორც იყო, ბორიამა და კაკო გელაშვილის მოადგილემ იძალეს, ერთ ჩამადანში ჩაალაგებინეს რამე-რუმეები და მინც გამამგზავრეს წალენჯიხიდან. ასე დასახლდა ანიჩკა ეთერთან და კაკო გელაშვილთან.

ეგ ამბები რო გავიგე, მინდოდა ხაშურში წავსულიყავ, ჩემი და მენახა. მაგრამ მარინამ არა ქნა: „არ გინდა, ბიძაჩემო, ხო იცი, ეგ კაკო ცოტა ურჯუკი კაცია, ამოდელა დელეგაციით ნუ ჩავადგებით, ემანდ ნერვები არ ეეშალოს. ჯერ მე ჩავალ, ვნახამ, რა ხდება და მერე, უფრო მოგვიანებით, შენ და თამარაც ესტუმრეთო“. როცა სამი დღის მერე დაბრუნდა ხაშურიდან, პირდაპირ მამა ზაზასთან მივიდა. რალაცა ითათბირეს. მე მარტო ის მითხრეს, რომ ჩვენ ოჯახს დიდი ცოდვა ანემს, ეხლა უნდა მარხვა შავინახოთ და ვილოცოთ ანიჩკას სულის გადარჩენისათვის, იქნება შაუნდოს ღმერთმა და აპატიოს ჭეშმარიტი რჯულიდან გადაცდენაო. სამ კვირას ვმარხულობდით. მერე მარინა და თამარა აღსარებაზე მივიდნენ ეკლესიაში და ზიარებაც მიიღეს მამა ზაზასაგან. მე კი ვერ შევძელ მისვლა, თირკმლის ტკივილმა შამანუხა. მაშინვე გადაწყდა, წესი აგვეგო მამიჩემისათვის. არ ვიცი, რას არგებდა ტიტკოს სულს ეგრე დაგვიანებული პანაშვიდი, მაგრამ წესი წესია და რაკი ჩვენი ოჯახი ეკლესიურ ცხოვრებას შაუდგა, მამა ზაზას დანაბარები უნდა აგვესრულებინა. სწორე რო გითხრათ, მე უფრო ჩემი დისტოვინა ვცდილობდი, თორე ამ წესებისა ბევრი არაფერი გემეგება. დღეც დანიშნა მარინამ – აპრილის ბოლო შაბათი. მეზობელ-ახლობლებს შავატყობინეთ და მზადება დავინწყეთ პანაშვიდისა და პატარა სუფრისათვის. დათქმულ დრომდინ ხუთიოდე დღელა რჩებოდა, რო ხაშურიდან ეთერმა დარეკა და სასწრაფოდ გამაიძახა მარინა: „მე დედაჩემს ველარ ვერევი, სუმთლად გაუგიჟებიათ იელოვლებსა. ჩამო, დამეხმარე რამე, თორე ემერია ე დალაგებული ოჯახიო!“ აბა, ავლელდით სუყველანი, ავფორიქდით. მარინამ ანდრო გოგოჭურსა სთხოვა, თავის მაზლს: „დედა მეღუპება, მიშველე, იქნება მანქნით წამიყვანო, რადგან, ვინ იცის, აქეთ წამოსაყვანი გამიხდესო“. ოქროს გული აქვს ანდროსა, უარს როგორ ეტყოდა, გაჰყვა. მე და თამარა კი დავრჩით ამ სუპერმარკეტისა და კაფეს საპატრონოდ. ვლელამ, კაცო, არ ვიცი რა წყალს მიცვე თავი. თან იმასა ვფიქრობ, ნეტა ისეთი რა უნდა დეეშავებინა ამ ჩემ უბედურ დასა, რო ღვიძლ შვილს ველარ აუტანია მაგისი თავი? მერელა გავიგე რაც მამხდარა ხაშურში. მარინამ მითხრა ატირებულმა, როცა დაბრუნდნენ.

დაბრუნებით კი მეორე დღესვე დაბრუნდნენ და ანიჩკაც ჩამაიყვანეს. ანდროს მანქანიდან მე და თამარამ გადმოვიყვანეთ დაჩიავებული და ხელშეხვეული ჩემი და. უცნაურად მიყურებდა ცხონებული, არც სიხარული ენერა სახეზე და არც მწუხარება. რა არი, ანიჩკა, გენაცვალე, რა ამბავია, მითხარი როგორა ხარ-მეთქი. იმან კი მიპასუხა, კარგადაო. ნელა მიტრიალდა და წავიდა მარინას სახლისაკენ.

ეგ კაკო გელაშვილი, ეთერის ქმარი, როგორც გითხარით, ხაშურის მილიციის უფროსი იყო. იქნება დღესაც მილიციის უფროსია, მაგრამ მე მაგისი აღარაფერი ვიცი. კარქა მოგეხსენებათ, ეკლესიის ამშენებელ კაცს როგორი წელგამართული ოჯახი ექნება. მაგის სახლს, გენაცვა, დაცინკული ჟემტის სახურავი ადგას, ბოლოში კრემლითა და აქეთ-იქიდან მომდგარი ჟემტისავე ირმებით. სოფლის ორღობესავით ფართო ბალკონები და კიბეები სუ ერთთავად ვაზით არის შაბურული. ახლა მარანი, პადვლები და სანოვაგით სამსე საკუჭნაოები!

კაკო მილიციის უფროსი რო არ ყოფილიყო, არაფრით არ შამაიყვანდა თავის ოჯახში იელოველ სიდედრს. მაგრამ ბორია ცეკვავასგან შეფუცხუნებულმა იფიქრა, საქმის გართულებასა და აურზაურს, ჯობია ანიჩკა წაღწევისას გამოვარიდო და აქ, ჩემ კანტროლქვემ ვაცხოვროო. კანტროლი კი, იცოცხლე, არ უჭირდა. მეორე სართულის ერთ ყველაზე პატარა ოთახში გააშენესა დედაბერი. იქ სანოლი, გარდირობი და პიანინო იდგა. საერთოდ, როგორცა ვხვდები, ეგ პიანინო ზალაში უნდა ყოფილიყო, მაგრამ სწორედ მაშინ იქ პოლი ეყარათ და პარკეტს აგებდნენ. ამიტომაც, სერვანტები დერეფანში მოხვდა, დივნები და კრესლოები – მარანში, პიანინო კი – ანიჩკას ოთახში. დღეში სამჯერ ქვევით, სამზარეულოში უშლიდნენ მაგიდას. სახლის უკან, ბოსტანშიც შეიძლო გავლა, მაგრამ წინა ეზოში, მეტადრე კი ჭიშკრის იქით, ორღობეში ფეხი არ უნდა გეედა. თუკი ვინმე იყო მოსული, ანიჩკა თავის ოთახში ადიოდა და იჯდა, მინამ სტუმარი არ წავიდოდა. წიგნებიცა ჰქონიათ გელაშვილებს, მაგრამ წიგნების შკაფი გასაღებით ჩეეკეტნათ. მარტო სახარება იდო გარეთ. „იკითხოს, იფიქროს და შეინანოსო“, – უბრძანებია კაკოსა. „რეცხვაში და საჭმლის მომზადებაში მაინც მომიხმარეო“, – ეთერისთვის უთქვამს ჩემ დას, მაგრამ უარი მიუღია, იელოველის გაკეთებულ კერძს კაკო არც თითონ შეჭამს და არც ბაღლებს აჭმევსო. რა ექნა მარტოობითა და უსაქმობით გაბეზრებულ ქალსა? მიუჯდებოდა პიანინოსა და უკრამდა. რა იყო მაგისი დაკვრა? ძირითადად ის, რაც ელიჩკა ვახვახიშვილისაგან ახსომდა და კიდე თავისით აწყობილი მუსიკები. კარქი სმენა ჰქონდა. თუკი რადიოში ყურს მოჰკრამდა რამე სიმღერას, იმ საათში როიალზე შეიძლო დეეკრა. ყოველდღე გელაშვილიანთ ფანჯრებიდან მუსიკა ისმოდა. კაკო ცოლს ეჯავჯლანებდა: „გააჩერე, ნუ უკრამს ე მამაცხონებული, თორე უკვე თელი მეზობლები მეკითხებიან, ვინ

მუზიკანტი გყამთ სახლშიო“. ეთერი იძახდა: „კარქი, დაუკრას, მაგასაც ხო მართლმადიდებლობა არა კრძალამს?! გულს გადააყოლებს და იელოვლებსაც დაივინყებსო“.

ბავშვებს ძრიალ მოსწონებიათ ანიჩკას მუზიკანტობა, განსაკუთრებით პატარა ბიჭს, გელასა. უფროსები, მარიამი და ქეთევანი, მამის შიშით მაინც ერიდებოდნენ იელოველ ბაბოს, ბიჭი კი წამდაუნუნე მაგის ოთახში შერბოდა, ხან დაკვრასა სთხოვდა, ხან რილაცის დახატვას, ხან ქალღმრთის სალდათების გამოჭრას. ეთერი უწყურებოდა, უშლიდა, მაგრამ ბიჭი, როგორც კი დროს იხელთებდა, დედ-მამის უჩუმრად მაინც ბაბოს ოთახს მიაშურებდა ხოლმე. ბოლოს მით გათამდა ყველაფერი, რო მაგრა სცემა კაკომ, ანიჩკას კი ბალებთან დალაპარაკება აუკრძალა. სუ უმადური ღორი უძახნია ჩემი დისათვის! თურმე ეთერსაც კარგა მაგრა ეჩხუბა, ლანძღა და უღრიალა: „ეგ გათახსირებული დედაშენი აქ იმისთინ კი არ ჩამამიყვანია, შვილები რო მამინამლოს და იელოვურად მაულრიცოს ტვინებო!“ ახლა ეთერი დასტაკებია ანიჩკას: „რა გინდა, რათ მინგრემ ოჯახს? დანებე თავი ჩემ შვილებსაო! დედოფალივით გაცხოვრებ, საქმეს შე შენ არ გაკეთებინებ, საქმელ-სასმელს არ გაკლებ და ეგრე უნდა გადამიხადო სამაგიეროო?“ ეგ ჩხუბი სამზარეულოში მამხდარა. ჩემი და ჩაის დასალევედ ყოფილა დაბლა ჩამოსული. გაოგნებული უყურებდა განინმატებულ შვილსა და სიძეს, თავს იმართლებდა რაც შეეძლო, ტიროდა და ასავსავებდა ხელებს. ხოდა, ამ დროს, შემთხვევით ჩაის ჭიქა წაქცევია და ახლად დასხმული ქაფქაფა ჩაი სტოლზე დასხმია. „შეხედე ამ უნამუსო დედაკაცს, ჩემი დანვა მაინდომა, ლამის სახეში შემასხა ჩაიო, – უყვრია კაკოს, – გეთორიე შენ ოთახში და აღარც შენი ხმა გავიგო და არც შენი დაკვრაო“. ამოდ უსხნიდა ანიჩკა, რო ბოროტი ზრახვა არა ჰქონდა და ჭიქა უნებურად წექცა. გაავებული კაკო და ეთერი ლანძღამდნენ და სთათხამდნენ. თანაც, გენაცვა, ეგ ამბავი კაკოს ყვირილზე შემოცვენილი შაშინებული ბავშვების თვალწინა ხდებოდა, თურმე. რამდენი უნდა ეთმინა ჩემ დასა? ჩვენმა ჯიშმა იფეთქა ბოლოს და ბოლოს – წამაიმართა გამხმარი დედაკაცი, არაფერი სთქვა, კიდე ბალებ მეერიდა, მაგრამ უცნაურად, მძიმედ გახედა დუშმორეულ ცოლ-ქმარს, მარტო მაგან რო იცოდა გამოხედვა, ისე. მერე უხმოდ ჩაუარა სიძესა და ქალიშვილს, თითქო მყეფარა ძალები იყვნენ და მალლა ავიდა თავის ოთახში. ცოტა ხანში კი იქიდან თურმე პიანინოს ხმა მოისმა. ვინ იცის, რას უკრამდა ანიჩკა ან რამდენ ხანს უკრამდა, ერთი კი ცხადია, ეგ დაკვრა თავზე ნეხვის დადება იყო მასპინძლისათინ. გაცოფებული ავარდა ზეით კაკო გელაშვილი, შაგლიჯა ოთახის კარი, მაგრამ ანიჩკას კი წარბიც არ შეუხრია, ისე გაუგრძელებია დაკვრა, გეგონება, აქ არაფერიაო. „გაჩუმდი, შე ბებერო ძალოო!“ – იყვირა კაკომ, მივარდა და პიანინოს სახურავს ბრახვანი გაადენინა. მარცხენა ხელის განევა კი მასწრო ანიჩკამა, მაგრამ მარჯვენა შიგ მოჰყვა და გამეტებით დაბრეხვებულმა სახურავმა თითები

გადაუმტვრია, საჩვენებელი და შუა. ტკივილისაგან გულნასული, ხაშურის საავადმყოფოში მიუყვანიათ. ეგ იყო, რომ ეთერმა მარინას დაურეკა და სასწრაფოდ გამაიძახა... ეგრე დაბრუნდა ჩემი და კამეჩაანთკარში.

მე ვიძახდი, ჩვენსა დავასახლოთ, მამა-პაპის სახლში-მეთქი, მაგრამ მარინამ არა ჰქნა: „ჩემთან იყოს, მე უფრო მოვუვლიო“. მართლა მოუარა, მელანელი ექიმბაშისაგან მალამო წამოიღო, მოტეხილ თითებზე უსვამდა, საფენებს ადებდა, არაფერს ეუბნებოდა აუგად, ცდილობდა, როგორმე დევეინყებინა დედისათვის ფინთი ამბები. მაგრამ მე ხო ვამჩნემდი – ანიჩკა ამ ქვეყნისა აღარ იყო. თითო-ოროლა სიტყვა თუ დასცდებოდა, უფრო კი გაყურებული იჯდა ბაღში და დათოვლილ კავკასიონს გასცქეროდა.

ამასობაში ტიტკოს პანაშვიდიც მოახლოვდა. დავსხედით კაფეში მე, თამარა და მარინა და ბჭობა გავმართეთ. მე პანაშვიდის გადატანას ვურჩემდი ჩემ დიშვილს. „რა გვეჩქარება, ანიჩკა მოვალნიეროთ, ხელი მოუშუშდეს, ცოტათი გონს მოვიდეს და მერე გავმართოთ წვეულება-მეთქი“. მარინაც თითქო ამ აზრზე იდგა, მაგრამ მაინც მამა ზაზასთან გადასწყვიტა მისვლა ჭკუის საკითხავადა. მართლაც მივიდა, არ დაუმალა ჩვენი ოჯახის ამბავი და პანაშვიდის გადატანის ირგვლივ ჩამაუგდო სიტყვა. მე როგორც მივხვდი, მარინას მოძღვარს დიდად არ ეპიტნავა იელოველი დედაკაცის კამეჩაანთკარში ჩამოსვლა. აუცლებლად უნდა მოინანიოსო, უთქვამს. არ არი ცუდი ყმანვილი მამა ზაზა, აუგს ვერ ვიტყვი, თუმცა, ერთი კია – დილას რო ელაპარაკა მარინა, საღამოთი უკვე თელი კამეჩაანთკარის მრევლმა იცოდა ანიჩკას ამბავი. ტიტკოს პანაშვიდის გადატანას რაც შეეხება, ასე უბრძანებია: „ნება თქვენია, მაგრამ მიზეზს ვერა ვხედავ, რათ უნდა გადაიტანოთ?“ ხოდა, რაკი ეგრე სთქვა, ჩვენც გადავწყვიტეთ, დათქმული დრო აღარ შეგვეცვალა, მაინც უკვე ხარჯი გვქონდა განეული და ხალხი დაპატიუებული.

ბედი არ გინდა, კაცო, მაინცდამაინც შაბათ დღეს წამოვიდა ღრუბელი სამხრიჯვრიდან, ცა მაიქუფრა და საავდროდ გვემზადა. ჩვენში ეგრე იცის მაისის დამდეგს. თამარამ დილიდანვე ქადები გამააცხო, მარინამ მამალი დაკლა. სუფრა ჩვენსა გავშალეთ, ვანა პაპას სახლში. დავიბანეთ, გამევეწყეთ სუფთა ტანისამოსში, როგორც შეგვეძლო და წავედით პანაშვიდზე. წინდანი გაგვაფრთხილეს, რო ანიჩკას საყდარში მისვლა არ იქნებოდა. დავტოვეთ ეგ საცოდავი სახლში. ჩვენა ვართ – მე და თამარა, მარინა, ანდრო გოგოჭური და რამდენიმე მეზობელი. წვიმას მივასწარით ეკლესიაში. ვდგავართ, ველოდებით როდის მორჩება წირვა და დაინყება პანაშვიდი. მამა ზაზა ოლარშია გამონყობილი. ცალ ხელში კანდელი უჭირამს, მეორეში – სახარება. ლოცვასა კითხულობს, დუდუნებს თავისთვინ. პატარა ბიჭი ეხმარება – წიგნის ფურცლებსა შლის.

უცბათ კარმა გაიჭრიალა. გავიხედე – ანიჩკა შემოდის ეკლესიაში ბებრულად ნელში მოხრილი. გაფითრებულია, პირმოკუმული, ხელშეხვეული. შავი თავსაფრის ქვეშიდან თეთრი თმა მოუჩანს. თვალები უცნაურად უელამს. მრევლს ჩურჩულმა გადაუარა. მამა ზაზამ შასწყვიტა კითხვა და წარბშეჭმუნულმა გადმოხედა ანიჩკას. ისიც გაჩერდა და უცნაურად მიაშტერდა ღვედელსა. ერთხან ასე უხმოდ უყურებდნენ ერთმანეთს. მერე მამა ზაზამ დაიძახა: „დაგვტოვე, ცოდვილო სულო! არ არი შენი ადგილი ღვთის სახლშიო!“ ხმაგაკმენდილი ვუცდით, რას იზამს ანიჩკა. ის კი ბებრული, აკანკალებული ხმით ამბობს: „მე მამაჩემს მინდა სანთელი დავუნთო“. მამა ზაზა კი: – „როცა ცრემლითა და სინანულით დაუბრუნდები მრევლსა და დედა ეკლესიას, მაშინ დაანთებ სანთელსაო!“ მეზობლის ქალმა მიიძახა: „რომელ ღმერთს უნთებ სანთელს, შე უწმინდუროო?!“ ახლა მეორე კვიის: „დახე, ამ ღვთისპირიდან გადავარდილს, ამას!“ მივვარდი ჩემ დას, ვეუბნები: „წამო, გენაცვა, არ შაიძლება. ტიტყოს სულსა ვცეთ პატივი, წავიდეთ აქედან-მეთქი“. იმას კი თითქო არ ესმის, ჯანმრთელი ხელი გაიშვირა შანდლისაკენ, სანთელს მოუკიდა და ბუდეში ჩასვა. ეხლა უკვე კაცებმაც იყვირეს. ატირებული მარინა ღვედელს მივარდა, დაუჩოქა, იმის კაბის ბოლოსა ჰკოცნის და პატიებასა სთხოვს. მე გასასვლელისაკენ მივათრემ ანიჩკას, თან ხალხის წყევლა-კრულვა ჩამესმის ყურში.

როგორც იყო, გარეთ გამოვალნიეთ. ეკლესიის კიბეები ჩავიარეთ თუ არა, საშინლად დაიგრუხუნა. მე ვუყვავებ ანიჩკას, მინდა დავამშვიდო, თანაც დროულად გავარიდო ხალხს. ისიც მორჩილად მამდევს, მაგრამ ვხედავ, რო ჩემი არაფერი ესმის, ცარიელი თვალებით იყურება და ზეზეულად ჩაძინებულივით მათფრატუნებს ფეხებსა. ეკლესიის ეზო ჯერ ბოლომდინ არა გვექონდა გავლილი, რო იელვა, დაიგრუხუნა და წამოვიდა თქემი. ეს ოხერი, ახლომახლო არც ხეა რამე, რო თავი შააფარო, უკანაც ვერ დავბრუნდებით, თავისთავად. ე ორი ბებერი მივტოპამთ ლაფის მდინარედ ქვეულ ორღობეში – ერთი უხელო, მეორე კი თითებდამტვრეული. განუნსულები და ტალახით მოთხვრილები ვეხუტებით ერთმანეთსა. ვერცა ვგრძნობთ, ვტირით თუ ცის წყალი დაგვდის პირისახეზე.

ღმერთი გაახარებს ანდროსა, ისევ იმან გვიშველა – დეგვენია თავისი მანქნითა და ჩაგვსხა. ეხლა ვფიქრობ: ჩემთან წავიყვანო ანიჩკა, – არ ივარგებს, საცაა სტუმრები მობრუნდებიან საყდრიდან, მამა ზაზაც მოვა და ეხლა ამათი შახვედრა არ იქნება. მარინასთან სახლში არავინაა, იქ მარტოკინას ვერ დავტოვებ, არადა მე უნდა სტუმრებთან მოვბრუნდე, სუფრას მივხედო. გავხედე ჩემ დას – თავი ჩემ მხარზე უდემს, თვალები დაუხუჭამს და სუ ერთთავად ბაბანებს. მა რა იქნება – თავით ფეხამდე სველია, ტანისამოსი კი იქა აქვს, მარინასთან. ჯანდაბას სუფრაცა და სტუმრებიც.



წვიმამ მალე გადაიღო. ცა გადინმინდა და ირგვლივ სველი მიწისა და ტყის სუნი დატრიალდა. კამეჩანთკარის სანახებში თავისებური, მსუყე სუნი აქვს ნანვიმარ მიწას, ვერაფერში ვერ აურემ. მახსენდება: პატარები ვართ მე და ანიჩკა, ტყის პირას, ველობზე ვისვენებთ. ვანა პაპაც იქვეა, მიწაზე ჩამოძვდარა, დაკოყრილ ხელებში მოზრდილი ბელტი უჭირამს, ჩვენ კი მუხლებზე ვდგავართ და ერთმანეთზე შუბლმიდებულნი ვყნოსამთ. ბელტს კი ნეშომპალის, სოკოსა და სიგრილის სუნი სდიის... მაშინაც ეგ გამახსენდა, როცა გოგოჭურიანთ სახლში ვიჯექი ჩემი დის სასთუმალთან, ცხელ ჩაისა ვსვამდი და სველი ხეებიდან ჩამოვარდნილი წვეთების წკაპუნს ვუსმენდი. ვინ მიხვდებოდა, ეძინა თუ ეღვიდა ანიჩკას? მაგრამ ნატანჯ სახეზე უცნაური ღიმილი ეფინა. ნეტა რა აღიმებდა ან რისი ნიშანი იყო ეგ ღიმილი?.. ეხლაც ვერ ვიცი.

ორი დღის მერე კი მამა ზაზა მოვიდა ავადმყოფის სანახავადა. მარინა დაფაცურდა, განჯინას მივარდა, თეფშებისა და ჭიქების გამოლაგება დააპირა, მაგრამ ღვდელმა გააჩერა, დედაშენთან მინდა დალაპარაკებაო. ცხადი იყო – იმდღევანდელი ამბავი აწუხებდა. აკი გითხარით, არ არი ეგ ცუდი ბიჭი. შევედით ანიჩკასთან სამთავენი. ღვდლის დანახვაზე ანიჩკა რალაცნაირად შაიკუმმა საბანქვემ, თავისებური მძიმე მზერით გადმოგვხედა. მამა ზაზამ პირველად გადაინერა და ჩვენ გვითხრა, მარტო დამტოვეთ ქალბატონთანაო. კარქა არ ვიცი, რა ილაპარაკეს. როგორც მერე გავიგე, ერთ კვირაში ალავერდელი მეუფე აპირებდა კამეჩანთკარში ჩამოსვლას. ამ დროისათვის ანიჩკას მარხვა უნდა შეენახა, ფსალმუნები ეკითხა და მოლონიერებულიყო. მერე ეპისკოპოსთან შესახვედრად ფეხშიშველი უნდა მოსულიყო ეკლესიაში, მუხლებზე დამდგარს საქვეყნოდ მოენანიებინა ცოდვა, მეუფე კი ეპიტიმისა დააღებდა. რა მკითხე? ეპიტიმია? მეც მაშინ პირველად გავიგე ეგ სიტყვა. მგონი სასჯელია საეკლესიო, თუ რაღაცა ეგრეთი. თუ ყველაფერს ისე შაასრულებდა, როგორც ეტყოდნენ, ზიარებას მიიღებდა და გახარებული ჩვენი მრევლი გულში ჩაიკრამდა გზაბნეული და უკან მობრუნებული კრავივითა. „აბა, შენ იცი, დედი, თავს ნუ მოგვჭრი თელ კახეთში, ისრე გააკეთე, როგორც მამა ზაზამ დაგარიგა. ხო გვაძლევ სიტყვასაო?“ – ჰკითხა მარინამ. ანიჩკა კი დუმდა, არ აძლემდა პასუხს. ტირილი აუვარდა მარინასა. ეხვენებოდა, ემუდარებოდა: „ნუ გვლუპამ, ნუ წაიწყმიდავ სულსაო“. რო აღარ მეეშვა, ანიჩკამ ერთი ამოიოხრა, წამოჯდა ლოგინში და მშვიდადა სთქვა: „კარქი... ოლონდ ეხლა წადით და მშვიდად დაიძინეთ. მე არაფერი მიჭირსო“.

მართალი რო გითხრათ, ვერკი წარმამედგინა ამ ხნის დედაკაცის ფეხშიშველა მიტანტალევა საყდარში, ისიც საქვეყნოდ და თელი სოფლის დასანახად. გონებით კი ვხვდებოდი, რო ეგრე იყო საჭირო და ამით, ბოლოს და ბოლოს, დაწყნარდებოდა ჩვენი აწენილი ოჯახი, მაგრამ გული სულ

სხვასა მთხოვდა. ახალგაზრდა რო ვყოფილიყავ, ვინ იცის, ბალკომზე გამოვმდგარიყავ და მეყვირა: „ნადით, თქვენი პატრონი დედაც-მეთქი!“ მაგრამ ჯერ საზოგადოდ ბებერ კაცს რა ვუთხარი და მერე კიდე ცალხელასა... ასე დაფიქრებული და კუდამოძუებული გამოვბრუნდი ჩემ სახლში.

დილით კი გოგოჭურთან მეზობლის ბალღი ამოვარდა და შეგვატყობინა, ანიჩკა ბაბო კაფეშია და კვდება, ღამით შუშის ბოთლი დაუნაყამს და შაუჭამიაო... თამარა აღმუვლდა დასაკლავი ძროხასავით, ხელების ქნევას მოჰყვა გაგიჟებული. მე კი ვიდექი პირგამშრალი და გაქევაებული. თავდაპირველად, როცა ბალღმა ანიჩკას ამბავი მომახალა, თელ ტანში ტკივილმა დამიარა ბლაგვად და მძიმედა. თითქო მუხის ვეება კოჭი კიდე ერთხელ ძირ დაქანდა და მაჯაზე დახვეულმა თოკმა ეხლა მეორე ხელიც მამანყვიტა. ტკივილი მაგარი იყო, მაგრამ ხანმოკლე. მერე უკვე ვხედამდი, მესმოდა, რაცა ხდებოდა ჩემ გარეშემო, იმას ვაკეთებდი, რასაც მეტყოდნენ, მაგრამ გრძნობით კი ველარა ვგრძნობდი ვერაფერსა. დანა რო დეესვა ვისმე, სისხლი არ გამამივიდოდა. თელი ის დღეები, მინამ ძალღვივით სოფლის გარეთ დავფლამდით, ცრემლი არ გადმამვარდნია... არც მაშინ, როცა ამ კაფეში, მეტლახის პოლზე მნოლიარე და პირიდან ნამსკდარ სისხლში მოთხვრილი ვნახე... არც მერე, როცა უკვე ჩაცმულ-გაპატიოსნებული ხის ტახტზე იდო კუბოს მოლოდინში... არც მაშინ, როცა მარინამ მაგისი ერთი კაბიდან სათუთად ჩაკეცილი ქალღლი ამიილო ბავშვის ნახატითა და წარწერით: „ანიჩკა ბაბო, ძან მიყვარხარ. შენი გელა გელაშვილი“.

მერე, როცა ყველაფერი მორჩა, ვანას შტოფი გავამსე ქაჭითა და გზას გავუყევი. ვერ ვიცოდი, სად მივდიოდი ან რათ მივდიოდი. შუადღის მზე უკვე კარგა გადანვერილი იყო, როცა ბოლო აღმართი ავამთავრე. ქანცგანყვეტილი დავჯექი მინაზე, შტოფი მოვიყუდე და ხარბად მოვსვი. მერე მიმოვიხედე და მივხვდი – სამხრიჯვარზე ამოვსულვარ. ეგე, ჩვენი იალალები, წყარო, თალარის კრამიტები და ჩაქცეული ბაგები. მერე ლოლუაანთ ხევისკენ მივბრუნდი და უცბათ შორეული სიმღერის ხმა მემესმა. ვხედამ – იქ, უფსკრულის პირზე პატარა გოგო დგა. იმასაც ვხედამ, რო მე და ვანა პაპა იქით გავრბივართ, ანიჩკასაკენ, გვეშინიან, ემანდ არ გადავარდეს. ის კი არხეინათა დგაა ლოდზე და თავის წკრიალა ხმითა მღერის, ე თმააბურძგნული, თითისწვერებზე შემდგარი გოგოცუნა, მოჯაჯული ბამბაზიის კაბიდან კნაჭა ფეხები რო მოუჩანს...

იმ ჰაერში გადაკიდებულ ლოდზე ჩამოვჯექე. მაშინ კი, იცოცხლე, წამსკდა ცრემლები. ვტიროდი და აღარა თავდებოდა ე ოხერი ვარამი. არაყსა ვსვამდი და ჩავკიოდი უძირო ლოლუაანთ ხევისა. ბოლოს, არაყიც გათავდა და ხმაც ჩამინყდა, ხრიალილა ამამდიოდა დამწვარი ხორხიდან. მერე თითქო რალაცამ

მამიჭირა და მამკრუნჩხა, თელი ტანი და ხელ-ფეხი გამიშეშდა და თვალთ დამიბნელდა..

მესამე დღეს მწყემსს ვუპოვნივარ ნითელ ლოდზე უგონოდ დაგდებული და მოკუნტული. ვერას გზით ვერ გამაშლინეს ხელ-ფეხი. ეგრევე მოკუნტული ჩამამიყვანეს სოფელში. არცა ვჭამდი და არცა ვლაპარაკობდი. არც ის მესმოდა, რას მეუბნებოდნენ. თელავის საავადმყოფოშილა მოვედი გონზე. მარინას პრაფესორი ჩამეყვანა თბილისიდან, გიუბის ექიმი. აურაცხელი ნევსები გეეკეთებინათ ჩემთვისა. არაფერი აღარ მახსომდა. „ნუ გეშინია, მახსოვრობა ნელ-ნელა აღგიდგება, ოღონდ მე რა წამლებსაც გამოგიწერ, ისინი უნდა სვა. არაყი და ღვინო კი დაივიწყო!“ – ეგრე მითხრა პრაფესორმა. მერე ეტყობა შავეცოდე და დაამატა: „ექვსი თვის მერე, როცა მეხსიერება დაგიბრუნდება, ცოტა პივა შაიძლება. ოღონდ ღვინო ან არაყი ერთი ჭიქაც რო დალიო, ისევე დაგკრუნჩხამსო“. ხოდა, გენაცვა, იმიტომაც ვეტანები პივასა, თორე ამას კახეთში, ხო იცით, რასაც ეძახიან? მამიუნების კაკაოს. ჩიფსები და პივა! მართლა მამიუნი გავხდი ამ სიბერეში.

განა პატარა ასაკისა ვარ – წლეულს ოთხმოცდაოთხი წელი მისრულდება. ცხოვრება ადგილზე არა დგას, გენაცვა, დრო გარბის და ყველაფერი იცვლება, თან იგრე მარდად, რო დილაზე გაღვიძებული, გუშინდელ ალაგს ველარა ვცნობ. თითქო სხვისას დამთვრალ-დაძინებული პახმელიაზე ვიღვიძებდე და შაშინებული ვაცეცებდე თვალებს – ღმერთო, მამაგონე სადა ვარ და როგორ მოვხვდი აქაო... ე ცხოვრება წინ მიდის თუ უკან, ვერ გეტყვით, ადგილზე რო არა დგა – ეგ ხო ნაღდია. აბა, პაპაჩემი რას იფიქრებდა, რო კამეჩაანთკარში კაფე და სუპერმარკეტი გაიხსნებოდა! რო ბაღლები ჟუვარკებსა და კოკა-კოლებს შაეჩვეოდნენ; რო ქალები, ნუკი გენყინება და, შენსევე ჭიპშიშველანი ივლიდნენ; ქურდები და მილიციის უფროსები ეკლესიების შენებას მიჰყოფდნენ ხელსა; უბრალო ხალხი კი ვილაცა მამაძაღლების ნაჩუქარ ფქვილსა და შაქარს დაჰხარბებოდა.

ერთადერთი, რაც არ გამაიცვალა, ისევე ეს კავკასიონის მთებია, მანონგადასხმულებივით რო დაგვქათქათებენ თავზე... ისე, როგორც ადრე, მეფე ერეკლეს დროსა.